

OMAHONGERO WOUKRISTE

MOTJIHERERO

OMAHONGERO WOUKRISTE

MOTJIHERERO

Printed by ELCIN Printing Press
Oniipa, Private Bag 2013, Ondangwa, NAMIBIA
2003

© ELOC PRINTING PRESS

ISBN 99916-33-67-7

OMAHONGERO WOUKRISTE

OKUVAZISA

Muhona wetu Jesus Kristus ma tja: “Otjiṅa tjimwe tja hepwa.” Luk.10:42.

1. Otjikeṅa ovandu tji va hepwa komeho yaavihe?
Ouṅingandu wokomuinyo.

2. Imba mbe hi na ouṅingandu wokomuinyo owo ouṅe?

Ovandu avehe pokukwatwa kwawo kave na ouṅingandu wokomuinyo.

“Orondu Omatjangwa maye tja: ‘Kape nomundu nangarire umwe ngu ri omusemba. Kape nomundu omunazondunge nu ngu paha ombango yaNdjambi. Avehe va poka ku Ndjambi; avehe va zundaka; kape na umwe ngu tjita ouwa, nangarire umwe ke po.’” Rom.3:10,12. “Pe nombatero omundu nanda munu ouye auhe nu a pandjarisa omuinyo we are? Indee uri! Eye ke notjiṅa tji ma yandja okumunina po omuinyo we.” Mat.16:26

3. Ouṅingandu wokomuinyo ouṅe?
Omuinyo waaruhe.

4. Omuinyo waaruhe ouṅe?

Omuinyo waaruhe owo mbu, ovandu ve tjiwe Ndjambi watjiri nOmuna Jesus Kristus.

“Nomuinyo waaruhe okwo ngwi okutja owo ve tjiwe Ove, ngu u ri Ndjambi watjiri, nokutja ve tjiwe Jesus Kristus ngu wa hinda.” Joh.17:3. “Ihi omundu tje ha munine nu tje ha zuvire nu tje he ripurire momutima we, otjo Ndjambi otja ṅunina imba mbè Mu suvera.” 1Kor.2:9.

5. Ndjambi matu mu tjiwa vi?

Ndjambi matu mu tjiwa, Eye omuini orondu we tu riraisira ne tu nanene kuye nondjingonekero yaaruhe.

“Ami mbe ku suvera norusuvero orukarerere, nu aruhe me karerere pokukuraisira ondjingonekero yandje.” Jer.31:3. “Ami mbe tji nanena ku Ami ne tji țizire potjitoma tjangde; mbe ripetera ku tjo ne tji koro.” Hos.11:4. “Kape nomundu ngu ma sora okuya ku Ami, tje ha nanenwe i Tate.” Joh. 6:44.

6. Ndjambi we tu ritjivisira vi?

Ndjambi we tu ritjivisira momambo we nomoviungura vye nomomananeno we ngu mae pangere ouye nomeraka rokomuinyo nomOmuna Jesus Kristus.

“Ndjambi wa hungirire kootate potuingi na momihingo omingi novinyo nyovaprofete, nungwari momayuva omasenina nga Eye wa hungira ku ețe mOmuna we.” Heb.1:1,2. “Omayuru ye serekarera ounene waNdjambi, nevaverwa ri hongonona oviungura vyomake we.” Ps.19:1. “Ove wa țika otjiwaņa tjoje tji wa kutura; Ove we ve twara nomasa woye komaturiro woye omayapuke.” Eks.15:13.

7. Omambo waNdjambi ya tjangerwa pi?

Omambo waNdjambi ya tjangerwa mOmbeimbela.

8. Ombeimbela ya haņewa motumbembera tungapi?

Ombeimbela i notumbembera tuvari.

9. Otumbembera i ho matu isanewa vi?

Otumbembera i ho matu isanewa:

Etestamente Ekuru nEtestamente Epe.

10. Etestamente Ekuru orine?

Orondi rouye okuza kombutiro youye ai yandere mongwaterno yaJesus Kristus.

11. Etestamente Epe orine?

Orondi rouye wa za mongwatero yaJesus Kristus naa u ka yanda meyuva esenina.

12. Omambo waNdjambi ya tjangwa i une?

Omambo waNdjambi ya tjangwa i ovanu ovayapuke vaNdjambi.

13. Ovanu imbo ovayapuke vaNdjambi ooune?

Owo ovaprofete, ovaevangeli novapostele.

14. Ozondunge zokutjanga va isa pi?

Va raerwa i Ndjambi muini ve ze tjang.

15. Omambo waNdjambi ya tjangwa rune?

Ovaprofete ve ye tjanga mouye wEtestamente Ekuru, vovaevangeli novapostele omouye wEtestamente Epe.

16. Omambo waNdjambi ya tjangisiwa i une?

Omambo waNdjambi ya tjangisiwa i Ombepo Ondjapuke yaNdjambi.

“Nu kombanda yaavihe tjiweye kutja kape nomundu ngu ma mangurura nozondunge ze omuini inga omaprofetero wOmatjangwa. Orondu kape nomaprofetero nge hi na indu ya zire mombango yomundu. Nungwari imba ovanu iyave hingwa i Ombepo Ondjapuke, tjiyave hungire ombuze ndja zire kuNdjambi.” 2Pet.1:20,21. “Omatjangwa aehe ya tjangwa nombatero yOmbepo yaNdjambi, nowo otji ye nonḡengu onene yokuhonga ouatjiri nokupirikira omahongero woposyo, nokuyyura ozondataiziro, nokukuna ongarero osemba, kokutja omundu ngu ri motjiungura tjaNdjambi a rire omupyuke tjinene nu e rirongerere okuungura otjiungura ngamwa atjihe otjiwa.” 2Tim.3:16,17.

17. Ndjambi matu mu tjiwa vi momambo we?

Ndjambi matu mu tjiwa momambo we, tjinangara matu lesa wo atu ye puratene nokukumba kuNdjambi, tu suvere tjiri

oku mu paha muwo, nokuzuva kuye, ndino Ombepo Ondjapuke mai tu munine a i paturura omeho wetu okumuna nokutjiwa Ndjambi.

“Tumbukeye kuNdjambi, nEye ma tumbuka ku ene.” Jak.4:8. “Hungira, Muhona, omukarere woye ma zuu.” 1Sam.3:9. “Notjina hi otji,tja tjita kutja tu rire ovazikame tjinene komeho mombuze ndji ndja zuvarisirwe i ovaprofete. Nu ma rire kokuwa tji mwa kara ko na tja na yo; oyo i ri otja emunine, ndi yera monzorera nga tji pa tji, nu nga Hingautuku tji mai yere momitima vyenu.” 2Pet.1:19.

18. Ndjambi matu mu tjiwa vi moviungura vye nomomapangero we?

Ndjambi matu mu tjiwa moviungura vye nomomapangero we, tji matu nongonona ovina mbya tjitwa i ye, orondu ongaro yaNdjambi mai munika moviungura vye.

“Okuza kombutiro youye imbi ovihamunika vyaNdjambi, okutja omasa we waaruhe nongaro ye otja ngu ri Ndjambi, vya vandururwa poruhaera, ovyo vi munikira kovitjitwa vye. Ovandu mba otji ve hi na maave tja kave nondjo oparukaze.” Rom.1:20.

19. Ndjambi me tu ritjivisa vi meraka rokomuinyo?

Meraka rokomuinyo Ndjambi me tu ritjivisa: tjinangara matu ungura nawa, ndino matu zuu ouwa momuinyo, nungwari tji matu ungura ouvi, ndino matu kandaiziwa keraka indi rokomuinyo.

“Ami mba zuu ozonywaa zoye motjikunino, notji mba tira.” Gen.3:10.

20. Ndjambi we tu ritjiwikisa vi muJesus Kristus?

Ndjambi we tu ritjiwikisa muJesus Kristus, tje mu hinda moye mwi

“Auhe ngwa munu Ami wa munu Tate.” Joh.14:9. “Kape nomundu ngu ma i ku Tate nokuhinaami.” Joh.14:6. “Nu indi Embo hde ura notjari nouatjiri ra rira omundu nari tura mokati ketu. Ete twa muna ongenangeneno ye, indji ongenangeneno Eye, otja ngu ri Omuna omukwatwaerike, ndja pewa i Ihe.” Joh.1:14.

EKONDWA ETENGA NDJAMBI

21. Ndjambi owa?

Ndjambi Ombepo ndje ura, ndje uririra eyuru nehi.

22. M**Ombeimbela** Ndjambi omuini me rihungire ama tja vi?

Ombeimbela mai tu raere, Muhona Ndjambi:

- 1) Eye erike Ndjambi, n**Omuhona** womayuru nehi;
- 2) Eye Ombepo;
- 3) Eye Omuinyo;
- 4) Eye Ondjerera;
- 5) Eye Orusuvero

“Zuva, Israel, Muhona Eye erike Ndjambi wetu.” Deut.6:4. “Ndjambi Eye Ombepo, nu imba mbu mave rikotamene ku Ye ve sokurikotamena ku Ye m**Ombepo** na mouatjiri.” Joh.4.24. “Ihe omuini otja tjinga e ri omburo yomuinyo, Eye otjinga a yandja k**Omuna** we a rire omburo yomuinyo.” Joh.5:26. “Nambano indji ombuze ndji twa zuva m**Omuna** we nu ndji twe mu zuvarisira, oyo ndji: Ndjambi ondjerera nu mu Ye kamu nongorera nangarire kaṭiṭi.” 1Joh.1:5. “Ingwi ngu ha suvere ka tjiwa Ndjambi, orondu Ndjambi tjinga e ri orusuvero.” 1Joh.4:8.

23. **Ombeimbela** mai tja vi okukara kwa**Ndjambi**?

Ombeimbela mai tja okukara kwa**Ndjambi**:

1) Eye Omuyapuke

“Omuyapuke, omuyapuke, omuyapuke ingwi Muhona **Omunamasaahe!** Ehi arihe re ura nounene we!” Jes.6:3. “Omatjangwa maye tja: Rireye ovayapuke, Ami tjinga ambi ri omuyapuke.” 1Pet.1:16. “Orondu ka**Ove** Ndjambi ngu u norutjato mourunde, omurunde ke neha p**Ove**.” Ps.5:4.

2) Eye Omusemba.

“Muhona Eye omusemba, nu u suvera ozondjito ozosemba.” Ps.11:7. “Ombanguriro osemba ya**Ndjambi**. Eye ma sutu auhe otja punga ape teki oviungura vye.” Rom.2:5,6.

3) Eye Omuwa, Omunauretima, Omunatjari nOmunanderorure.

“Okutjavi tji mo Ndji pura kutja otjiņa otjiwa otjikeņa? Pe na Umwe porwe eye ngu ri omuwa.” Mat.19:17.

Muhona eye u nomutima omure u notjari nomunaunyanutima.

“Otja ihe pungu e totjari novanatje ve, Muhona opunga e totjari na imba mbe Mu karera.” Ps.103:8,13.

4) Eye Omunandjenda nOmutakame.

“Ove wa nyengura ouwa ounene womutima waNdjambi, nonđaro orure ye nouretima we are? Ko nakutjiwa are kutja Ndjambi mouwatima we ma vanga okukueta kondanaukiro yomutima are?” Rom.2:4. “Eye, ngwe mu isana, ma yenenisa ihi, tjinga e ri omutakame.” 1Tes.5;24. “Omambo waMuhona owó ouatjiri, noviungura vye avihe ovyo ovitakame.” Ps.33:4.

5) Eye Ndjambi waaruhe.

“Ngunda au hiya mema ozondundu nau hiya uta ehi nouye, tjandje Ove opu u ri Ndjambi waaruhe, notjinga amo karerere Ndjambi aruhe nga aruhe.” Ps.90:2. “Eyuru nehi maye yanda, nungwari Ove mo karerere po; owo maye kurupa otja ozombanda. Ove mo ye imbirahi otja ozombanda ozonguru, nowo maye zengi. Nungwari Ove aruhe mo kara tjingeye Ove, nozombura zoye kamaaze yanda ko.” Ps.102:26,27.

6) Eye ka runduruka.

“Otjiyandjewa atjihe otjiwa, notjipewa atjihe otjipwe, vi za keyuru. Ovyo vi za kombanda ku Ndjambi ngwa mema ovimunine vyeyuru, ngu ha runduruka nu ngu ha tjiti onđorera momerivingururiro.” Jak.1:17.

7) Eye u kara aruhe.

“OwAmi Ndjambi ngu mbi ri akuhe, popezu nokokure. Kape na ngu ma sora okurihoreka poņa pu mbi hi nokumumuna. Ko nakutjiwa kutja mbi ri akuhe, meyuru na kombanda yehi are?” Jer.23:23,24.

8) Eye Omunandjiviro erike.

“Muhona wa zikamisa ehi mounongo we; nu mondjiviro ye Eye wa

pamisa evaverwa.” Omia.3:19. “Ounene woviyari vyaNdjambi, tjiri, ouhasanekwa! Ounongo nondjiviro yaNdjambi, tjiri ovihavazewa! Owaŋi ngu ma sora okuteza ozombanguriro ze?” Rom.11:33.

9) Eye omunamasa erike.

“Ndjambi wetu u ri meyuru, atjihe tji ma vanga Eye u tjita.” Ps.115:3.

10) Eye u tjiwa avihe.

“Muhona, Ove we ndji konḡonona nu we ndji tjiwa. Ove u tjiwa ohaameno nosekameno yandje; u tjiwa ourizemburuka wandje, ngunda ambi hiye ripura na wo.” Ps.139:1,2.

11) Eye omuḡingandu, Ombara yozombara nOmuhona wovahona.

“Ndjambi omuini onḡu me ye yenenisa, ingwi Omunauhona omuwa nerike porwe, Ombara yozombara noMuhona wovahona.” 1Tim.6:15.

24. Mokuhungira oundjambi Ombeimbela mai tja vi?

Mokuhungira oundjambi Ombeimbela mai tja: moundjambi mu na ozopersona ndatu: Ndjambi Ihe, Ndjambi Omuna na Ndjambi Ombepo Ondjapuke. Mena ra nao, okuhungira Ndjambi mozopersona ndatu, tu tja: Ndjambivetatumwe.

“Otji mwa sokuyenda koviwaḡa avihe ngamwa akuhe mu kaise po ovandu ovahongewa vandje amamu ve papitisa mena raTate nOmuna nOmbepo Ondjapuke.” Mat.28:19. “Otjari tjaMuhona Jesus Kristus, norusuvero rwaNdjambi, noruwano rwOmbepo Ondjapuke ngaru kare na eḡe amuhe.” 2Kor.13:13.

25. Opersona yomoundjambi otjikeḡa?

Opersona yomoundjambi Eye ingwi ngwe na omuinyo muye omuini, u ri peke u na ongaro ye, u ripura, u hungira, nu u ungura. Tji matu hungire ozopersona zomoundjambi matu tja: ozopersona azehe ze ḡa pamwe, ngamwa operona yomundjambi i nomuinyo nongaro yayo oyini: Opersona ondenga ipeke, oitjavari ipeke noitjatatu ipeke. Azehe kumwe maze rire Ndjambivetatumwe.

26. Moundjambi opersona ondenga o ine, opersona oitjavari o ine, nopersona oitjatatu o ine?

Moundjambi opersona ondenga oNdjambi Ihe, opersona oitjavari oNdjambi Omuna, nopersona oitjatatu oNdjambi Ombepo Ondjapuke.

27. Ombeimbela mai tja vi mokuhungira opersona oitjavari?

Ombeimbela mokuhungira opersona oitjavari, mai tja Eye Omuna waNdjambi wa kwatwa i Ihe, ngunda ouye au hia tjitwa.

“Orondu Ndjambi ke na pa tjere ku ngamwa omuengeli: ‘Oove Omuna wandje, indino Ami ondi mbe ku kwata.’ Nu wina ke na pa tjere: ‘Ami me rire Ihe, nEye ma rire Omuna wandje.’ ” Heb.1:5.

28. Ombeimbela mai tja vi mokuhungira ongarasano yOmbepo Ondjapuke naNdjambi Ihe nOmuna?

Ombeimbela mai tja: Ombepo Ondjapuke yi za muNdjambi Ihe nomOmuna wina ngunda ouye au hia utwa.

“Nu Omuvyonge, indji Ombepo Ondjapuke, Tate ngu ma hindi mena randje, me mu hongo oviṅa avihe ne mu zemburukisa avihe mbi mbe mu honga.” Joh.14:26. “Nu Omuvyonge me ya, indji Ombepo youatjiri, ngu ma zu ku Tate. Ami me mu hindi ku ege okuza ku Tate, nEye me Ndji hongonona.” Joh.15:26.

EKONDWA ORITJAVARI NDJAMBI IHE NOVIUNGURA VYE

29. Omena raye opersona ondenga tji mai isanewa Ndjambi Ihe?

Opersona ondenga mai isanewa Ndjambi Ihe, orondu Eye Omuute nOmuhonapare nOmuhupise wovandu avehe nowoviutwa avihe, na wina Eye oIhe yoMuhona wetu Jesus Kristus, mena raJesus Eye oIhe yovakambure avehe.

“Ete atuhe kawete ovaihe imwe are? Ndjambi kaumwe ngwe tu mema are?” Mal.2:10. “Nopu me zu okuwora ozongoro komurungu walhe waMuhona wetu Jesus Kristus mu mu za oruwano aruhe rwovakambure meyuru na kombanda yehi.” Ef.3:14,15.

30. Oviungura vyaNdjambi Ihe ovine?

Oviungura vyaNdjambi Ihe ovyo mbi: ombutiro, ouvara nouhonapare kombanda yovina avihe.

“Korutenga Ndjambi wa memene eyuru nehi.” Gen.1:1. “Muhona, Ndjambi wetu, Ove wa pwa ondjozikiro nondengero nomasa, orondu Ove wa uta ovina avihe, novyo avihe vya utwa navi pewa omuinyo i ombango yoye.” Omav.4:11.

31. Ombutiro otjikeŋa?

Ombutiro otjo otjiungura tjaNdjambi omunamasa erike, pomautiro tja uta nomambo we ovina avihe na isana ovina mbi ha ri ko naavi kara ko.

“Omongamburiro ete tji tu tjiwa nawa kutja ouye wa utwa i embo raNdjambi, kokutja imbi mbi munika vya zire mu imbi mbi ha munika.” Heb.11:3. “Omayuru ya utwa i embo raMuhona, eyuva nomueze nozonyose vya utwa i omarakiza we.” Ps.33:6.

32. Oviutwa avihe Ndjambi u vi nana nu u vi pangera vi?

Oviutwa avihe Ndjambi u vi nana nu u vi pangera nomambo we nomasa we norusuvero rwe nousemba we nozondunge ze.

“Mu Ye omu tu nomuinyo nomu tu nyinganyinga nomu tu ri. Poo otja ovatjange venu vomitandu punga amave tja: ‘Ete wina oweŋe orukwato rwe.’” Oviu.17:28. “Tareye kozongera zokuti: Ozo kaze kunu nu kaze kondo, nu kaze wongere momatuwo womapwikiro, nungwari Iho meyuru Eye ngo u ze kora.” Mat.6:26.

33. Ndjambi ouye tje u uta wa ri vi?

Ndjambi ouye tje u uta wa ri ouwa, nu mbwa pu.

“Nu Ndjambi wa nongonona avihe mbya ungura, nu vya ri oviwa tjinene.” Gen.1:31.

34. Oviutwa avihe Ndjambi we vi mema omayuva yengapi?

Oviutwa avihe Ndjambi we vi mema omayuva hamboumwe. “Orondu momayuva hamboumwe Muhona wa mema eyuru nehi, nokuvare na avihe mbi ri mu kwo, nEye wa suva meyuva oritjahambombari.” Eks.20:11.

35. Oviutwa vyaNdjambi mbi ri ovinene okukapita ovikwao ovige?

Oviutwa vyaNdjambi mbi ri ovinene okukapita ovikwao ovyo ovaengeli novandu.

36. Ovaengeli ovikena?

Ovaengeli owo ovahindwa vaNdjambi, posiya owo ozombepo ozombwa, va pewa i Ndjambi ozondunge ozengi nomasa nondjerera.

“Ndjambi ma tjiti ovaengeli ve ve rire ovivepo, novakarere ve ve rire otururumo twomuriro.” Heb.1:7.

37. Ovaengeli avehe va kara tji na tji va utwa?

Aye, ovaengeli avehe kave na pu va kara tjina tji va utwa, tjiva vawo va sya po Ndjambi, narire tji va utu otjimbumba tjonḍorerera, nomunane watjo a rire Satan.

“Satan eye omuzepe okuza kombutiro, nu keya rora okuungurira ouatjiri, mu ye tjinga amu hi na imbwi ouatjiri. Tji ma kora ovizeze, u tjita imbi porwavyo mbye mu pwira, tjinga e ri omunavizeze ne ri ihe yovizeze avihe.” Joh.8:44. “Ovaengeli imba mbe ha karere pu pa yandera ouvara wawo, nungwari mba isa omaturiro wawo. Ndjambi we ve pandekere nomapando nge ha timbauka, nu u ve țizira mourekoto womuzororema mu mave undjire ombanguriro yawo mEyuva ndi enene.” Jud.1:6. “Ndjambi ka yamene ovaengeli mba mba tjita ouvi, nungwari we ve yumba motjovasengwa. Owo nambano va țizirwa mo nomapando monḍorerera okuundja eyuva rombanguriro.” 2Petr.2:4.

38. Ovaengeli ovavi ve ungura ovikenā?

Ovaengeli ovavi va tonda Ndjambi nombango ye osemba, otji ve rora nokupoporora nokutenga ovandu ve ve pandjarise, noku ve twara mombandjarero yaaruhe.

“Kareye nomuungutima nu mu kare katumba! Omunavita na ege, ingwi Satan, u ryanga otja ongeyama, ndji mai tje ovimboro amai paha ingwi ngu mai vanga okuteta.” 1Petr.5:8.

39. Ndjambi ma kara vi?

Ndjambi ingwi aruhe uungura ouwa, Eye muini ma tjaere na pindikire ouvi, Eye me u pe omikoka ne u pangere u kare mau ungura ombango ye ombwa.

“Amu riwovisa oveni, Ndjambi ka nyekererwa. Ihi omundu tji ma kunu, wina otji ma kondo.” Gal.6:7. “Ege mwe ripura okutjita ouvi ku ami, nungwari Ndjambi wa tanaurira ouvi kouwa.” Gen.50:20.

40. Oviungura vyovaengeli ovawa ovine?

Oviungura vyovaengeli ovawa ovyokutanga nokuyozika Ndjambi nokuungura ombango ye nokuvatera ovakambure.

“Tangeye Muhona, owege ovaengeli ovanamasa, mbu mu kara nonduviro komarakiza we, nu mbu mu puratena ku imbi Eye mbi ma hungire.” Ps.103:20. “Owo avehe ozombepo nge karera Ndjambi, nu nge hindwa i Ye okuyekuvatera imba mbu mave rumata ombwiro yomuinyo.” Heb.1:14.

41. Ombangurirotjari yaaruhe yaNdjambi otjikenā?

Morusuvero rwaNdjambi eye we tu toorora mu Kristus ngunda ouye au hiya utwa nee tu tjiti tu rire ovanatje ve tu rumate omuinyo waaruhe. Imba mba kambura muKristus owo mave ka muna omuinyo waaruhe, imba mbe ha kamburire muye owo ve ri pandjarisa oveni. Indjo oyo ndji ri ombangurirotjari yaaruhe yaNdjambi.

“Ouye ngunda au hiya utwa, Ndjambi we tu toororera okurira ove mu

Kristus kokutja tu rire ovayapuke novehinatjipo komurungu we. Nu morusuvero rwe Ndjambi wa tyere rukuru okutuisa po ovanatje ve mu Jesus Kristus pungu ape tjata kombango ye.” Ef.1:4,5. “Indjeye, vanandaya vaTate! Indjeye mu rumate ouhona mbwa tuninwa ene okuza kombutiro youye.” Mat.25:34. “Orondu Ndjambi wa suverere ouye tjinene nai nga tja yandja Omuna we omukwatwaerike, kokutja auhe ngu ma kambura mu Ye a ha pandjara, nungwari a kare nomuinyo waaruhe.” Joh.3:16.

42. Ndjambi wa mema omundu ngwe ri vi?

Ndjambi wa mema omundu omuwa nomusemba nomuyapuke nomuningandu.

43. Ndjambi wa mema omundu kombunikiro ya une?

Ndjambi wa mema omundu kombunikiro ye; we mu mema kosaneno ye omuini.

“Ndjambi otja mema omundu otja kombunikiro ye; otja kombunikiro yaNdjambi Eye otje mu mema: Eye wa mema omurumendu nomukazendu.” Gen.1:27. “Muhona Ndjambi wa zezenga omundu poruuma rwehi, na suvire mo omuinyo meuru re; nomundu wa rira omunamuinyo.” Gen.2:7.

44. Osaneno yaNdjambi ndji ri momundu otjikeŋa?

Osaneno yaNdjambi ndji ri momundu oyo ndji Ndjambi tje mu mema kosaneno ye, wina tja pewa ozondunge nombango neraka rokomuinyo, na wina tje mu mema omuwa nomusemba, a kare nombango nomasa okutjiwa Ndjambi noku mu suvera nokuungura ombango ye.

45. Omundu hapo wa kara mongaro ye ondenga?

Kako! Omundu ke na paa kara mongaro ye ondenga, wa ya a sye po Ndjambi.

**EKONDWA ORITJATATU
OKUNYONA KOVANDU OVATENGA**

46. Ovandu ovatenga oowani?

Ovandu ovatenga owo Adam naEva.

47. Owo va nyona vi?

Ovandu va nyona, orondu kave na pu va takamisa omambo waNdjambi nokukambura muwo, nungwari va puratena eraka romupandjarise naa ve suvere ouvi. Momuano mbwi owo va katuka etwako raNdjambi.

48. Adam naEva va pandjarisiwa i une?

Adam naEva va pandjarisiwa i Satan.

49. Ongatukiro yawo ye ve tjitira tjike?

Ongatukiro yawo ye ve tjitira; osaneno yaNdjambi ndja kara muwo, ya nyonoka, orondu ozondunge zawo za hara onqorera; ombango yawo ya ryama kouvi; eraka rokumuinyo rawo ravera; owo va rira ovahuurwa vourunde novonqiro novaSatan.

“Omundu wa tja: ‘Ami mba zuu ozonywaa zoye motjikunino, notji mba tira, orondu tjinga ambi ri muzu; opu mba zu okukaqara.’” Gen.3:10. “Orondu omasutiro wouvi owo onqiro.” Rom.6:23.

50. Okunyona kovandu ovatenga kwe ve yetera tjike?

Okunyona ngwi; kavandu erike mbena ovatenga va muna onyonokero, kako, ouvi nourunde nonyonokero ya hita momuhoko auhe wovandu; ovandu avehe ave rire ovavi novarunde novarumate vourunde novonqiro.

“Omutima womundu tjinga au nomerizerero nombahero ombi okuza kouqiti we.” Gen.8:21. “Avehe va poka ku Ndjambi, avehe va zundaka; kape na umwe ngu tjita ouwa, nangarire umwe ke po.” Rom.3:12. “Ouvi wa zira momundu umwe nau ya mouye, nonqiro ai zu

mouvi. Komuhingo mbwi onđiro otji ya tuurunga movandu avehe, owo avehe tjinga ava tjita ouvi.” Rom.5:12.

51. Okunyona komundu kwa yetera tjike oviutwa ovikwawo?

Okunyona komundu kwa yetera oviutwa ovikwawo; osengiro.

“Ove tjinga awa puratene keraka romukazendu woye no ri kovihape, mbi mba tja: O ri ku vyo! ehi ndi ekunwa otji mari sengwa mena roye.” Gen.3:17. “Oviutwa avihe vi undja nonđero onene tjinene kutja Ndjambi a raise kutja ovanatje ve oveņe. Oviutwa vya tyerwa kutja vi yande, nu kakutja a ri ombango yavyo, nungwari a ri ombango yaNdjambi omuini. Nu vari Ndjambi we vi pa omaundjiro.” Rom.8:19,20.

52. Ourunde otjikwae?

Ourunde owo ondimo yomuinyo womundu tja yesa Ndjambi nongatukiro okukatuka omatwako waNdjambi nokuyumanisa Ombepo Ondjapuke.

“Ingwi ngu ma tjiti ouvi u nondjo yokukatuka omatwako waNdjambi.” 1Joh.3:4.

53. Ourunde i ungapi?

Ourunde u ri pevari: Ourumatwarunde noungurwarunde.

54. Ourumatwarunde oukeņa?

Ourumatwarunde owo ouvi imbwi auhe mbu ri mweņe twe u rumata kuAdam naEva.

“Ami me tjiwa nawa kutja ouwa mu ami kau tura, me hee kutja mongaro yandje otja ngu mbi ri omundu; orondu nandarire kutja indji ombango yokutjita ouwa mbi nayo, ami hi sora okuutjita.” Rom.7:18.

55. Ouungurwarunde oukeņa?

Ouungurwarunde owo ouvi imbwi mbu ya momeripuriro

wetu omavi, au zuvaka momambo wetu omavi wina mau munika moviungura vyetu ovivi.

“Nozonḡuma ze zourunde tji ze urisiwa ze kwata ouvi, nouvi tji wa yenenisiwa u kwata onḡiro.” Jak.1:15. “Orondu momutima we omu mu za omeripuriro omavi nge mu popera kokuzepa nokukatuka orukupo nokutjita ouhakohoke ngamwa auhe, nokupunda ovakwao oviḡa, nokukora ovizeze, nokuyamburura ovakwao.” Mat.15:19. “Nomundu ngu ma tjiwa okutjita otjḡa otjiwa ne he tji tjiti, eye omunandjo.” Jak.4:17.

56. Ondjambi yourunde oiḡe? Ondjambi yourunde oyo onḡiro.

“Orondu omasutiro wouvi owo onḡiro, nungwari otjiyandjewa tjojari tjaNdjambi otjo omuinyo waaruhe moruwano na Kristus Jesus oMuhona wetu.” Rom.6:23.

57. Onḡiro i ngapi?

Ozonḡiro i ndatu, Onḡiro yokomuinyo noyokorutu noyaaruhe.

“Eḡe mwa kokere, tjinga amu ha ri nonḡuviro.” Ef.2:1. “Orondu ove oove oruuma, nu mo yaruka koruuma.” Gen.3:19. “Nungwari imba ovimumandu novahaḡakama novayaukise novazepe novavakirasane na imba mbe tjita ourozi na imba mbe rikotamena koomukuru vovisenginina novanavizeze avehe, oruveze rwawo orwo ndwi erindi mu mu yaka omuriro nosurungu, okutja onḡiro oitjavari.” Omav.21:8.

58. Onḡiro yokomuinyo oiḡe?

Onḡiro yokomuinyo: Omuinyo womundu tji wa sya poNdjambi mena rourunde.

59. Onḡiro yokorutu oiḡe?

Onḡiro yokorutu oyo indji: Omuinyo tji mau zu morutu.

60. Onḡiro yaaruhe oiḡe

Onḡiro yaaruhe: Omundu nomuinyo we norutu rwe tji mavi

hanika naNdjambi omunamuinyo ngaa aruhe, na yumbirwa motjomuro.

61. Ndjambi wa imbirahi ovandu mena rourunde wao?

Kako, Ndjambi ke na pa yumbirahi ovandu mena rourunde wao, nungwari we ve kwizikira onguturo, nu oruveze tji rwa yenene we ve hindira Omukuture.

“Nungwari oruveze Ndjambi ndwa twire po tji rwe ya, Eye otja hinda Omuna we. NOMuna we ngwi wa kwatwa i omukazendu, nokuza kongwato ye Eye wa kara kehi yOmatwako waMoses, kutja a rande nu a kuture imba mba ri kehi yOmatwako nga, kokutja eje tu isirwe po ovanatje vaNdjambi.” Gal.4:4,5.

62. Ongwae Ndjambi tje hia kutura ovandu eyuva ndi ve mu sya po?

Ndjambi ke na pa kutura ovandu eyuva ndi ve mu sya po, orundu wa ri ma vanga oku ve tunina onguturo noku ve tunina omuano mbu ve sokukambura onguturo yokomuinyo tji ye ya.

63. Onguturo ya tunwa vi?

Onguturo ya tunwa: Ndjambi tya toorora otjiwana imwi mwa pwikira ombango yonguturo, motjiwana ho mu mwa kwatwa Omukuture wouye.

64. Otjiwana ho otjine?

Otjiwana ho Ovaisrael.

65. Ovandu Ndjambi we ve tunina vi okukambura onguturo?

Ovandu tji va isa Ndjambi, ndino Ndjambi we ve esa, ve ka yende nozondjira zao oveni, owo wina ve rore okuri vatera oveni.

66. Ozongondjero zovandu nõo ze ve hong'a okutjiwa tjike?•

Ozongondjero nõo za hongo ovandu okutjiwa oungundi nouvi wao, wina aze ve hongo okuzera ongutukiro.

67. Ondero ndjo Ndjambi we i zeuparisa notjikeña?

Ondero ndjo Ndjambi we i zeuparisa nomaronga nomakwizikiro we momiano omingi mbya raera Ovaisrael.

68. Ovandu va tjiwisiwa kotjikeña kutja va nyona, nu veri ungurira omberero, mave hepa ongutukiro?

Omatwako omayapuke waNdjambi owo inga nga tjivisa ovandu kutja owo ovanazondjo, ovazundare mbe ri ungurire omberero, na ve hepa ongutukiro.

69. Omatwako omayapuke waNdjambi oyene?

Omatwako waNdjambi ye ri pevari:

- 1) eraka raNdjambi indi nda tjanger'a momuinyo womundu okuza kombutiro; ondjiviro yomomuinyo;
- 2) omatwako we ya tjangerwa kondundu na ye yandjwa ku Moses.

“Ndjambi wa yandjere Omatwako mu Moses, nungwari otjari nouatjiri ovyo vya pitira mu Jesus Kristus.” Joh.1:17.

EKONDWA ORITJAINE

OVETA POO OMATWAKO OMURONGO

WANDJAMBI

70. Momatwako we Ndjambi me tu tjivisa tjike?

Momatwako we Ndjambi me tu tjivisa ombango ye ondjapuke, ihi tje vanga na ihi tje ha vanga.

71. Omatwako ya hanewa novimbumba vingapi?

Omatwako ya hanewa movimbumba vivari.

**72. Otjimbumba otjitenga tji na omatwako iyengapi?
Otjimbumba otjitenga tji na omatwako yetatu wokomautiro.**

**73. Otjimbumba otjitjavari tji na omatwako iyengapi?
Otjimbumba otjitjavari tji na omatwako hambombari
omasenina.**

**74. Momatwako yetatu omatenga Ndjambi me tu
tjivisa tjike?**

Momatwako yetatu omatenga Ndjambi me tu tjivisa,
omuano mbu tu sokukara naye omuini nomuano mbu tu
sokukara nomambo we.

**75. Momatwako warwe hambombari Ndjambi me tu
tjivisa tjike?**

Momatwako warwe hambombari Ndjambi me tu raere
omuano mbu tu sokukara novandu ovakwetu novina vyao.

ETWAKO ETENGA

OWAMI MUHONA, NDJAMBI WOYE, KO NOKUKARA KO
NOOMUKURU VARWE POSI YANDJE.

**76. Metwako indi etenga Ndjambi me tu raere, eṭe tu
kare vi?**

Metwako indi etenga Ndjambi me tu raere, Eye erike tu mu
suvere, tu riyameke kuye, eṭe tu mu tate kominyo vyetu
avihe.

“Suvera Muhona Ndjambi woye nomutima woye auhe nomuinyo woye
auhe nozondunge zoye azehe.” Mat.22:37.

**77. Metwako indi Ndjambi me tu raere atuha kara vi?
Metwako indi Ndjambi me tu raere, atuha kara noomukuru
varwe nomambo varwe atu kara atwa suvera, poo tu tire,**

poo tu tate ovitjitiwa norusuvero ndwa ka pita okusuvera Ndjambi, aatu kutu ominyo vyetu kovina vyakauriri.

“OwAmi erike ngu mbi ri Muhona, Ndjambi woye. Kape nomukuru warwe ngu matu haanasana ondjozikiro yandje na ye; Ami hi nokuhaanasana ko ondangero yandje puna oviserekarera vyovisinginina.” Jes.42:8. “Amu suvere ko ouye novina avihe vyoye. Tji mwa suvere ouye, okutja kamuya suvera Tate.” 1Joh.2:15.

ETWAKO ORITJAVARI

KO NOKUTAMANEKA KO ENA RAMUHONA, NDJAMBI
WOYE, ORONDU MUHONA TJE HI NAKUMUESA
NOKUHAVERWA INGWI NGU MA TAMANEKE ENA RE.

78. Metwako ndi oritjavari Ndjambi me tu raere atuha kara vi naye?

Metwako ndi oritjavari Ndjambi me tu raere atuha nyengura ena re.

79. Ena raNdjambi mari nyengurwa vi?

Ena raNdjambi mari nyengurwa, omundu tjinangara ma yamburura Ndjambi nomambo we noviungura vye, poo ma tukana, ma yana, ma vetere, poo ma veterisa nokuungura ovina vyarwe o hamukwao na imbyo, okutja omundu wa nyono etwako ndi, wa nyengura ena raNdjambi, orondu ovina avihe mbyo ovivi.

“Kamu nakuyana ko ovizeze mena randje, nu kamu nokuyamburura ko ena raNdjambi wegu komuhingo mbwi. OwAmi ngu mbi ri Muhona.” Lev.19:12. “Otjiwaga hi tji Ndji yozika notjinyo, nungwari omutima watjo u ri kokure na Ami.” Mat.15:8. “Auhe ngu ma tukana Ndjambi ma vererwa ondjo youvi mbwa tjiti.” Lev.24:15. “Ami me mu reare kutja amu yana ko tji mamu tjiti omakwizikiro. Amu yana keyuru, tjinga e ri otjihavero tjouhona waNdjambi. Omambo wegu ngaye rire ii, ii na indee; indee, warwe aehe ngu mamu hungire ye za

kOmunaurunde.” Mat.5:34,37. “Vakwetu, kombanda yoviṅa avihe amu yana ko tji mamu tjiti omakwizikiro. Amu yana keyuru poo kehi poo kotjiṅa ngamwa atjihe. Itjeje: ‘Ii’ tji mamu hee kutja ii, nu itjeje: ‘Indee uri’, tji mamu hee kutja indee uri. Indino otji mu hi nokupangurwa i Ndjambi.” Jak.5:12.

80. Metwako ndi matu raerwa tu kare vi nena raNdjambi?

Metwako ndi matu raerwa tu yapure ena raNdjambi momeripuriro wetu, momambo wetu nomoviungura vyetu, tu ri yameke kuro, tu ri tange eṅe tu ri tate.

“Kwa ku Ami meyuva rombamisiro, Ami me ku yama, nove mo Ndzi yozike.” Ps.50:15. “Tji pe nomundu mokati keṅu ngu ri moumba, nga kumbe. Nu tji pe nomundu ngu nenyando, nga imbure omatangero.” Jak.5:13. “Ndjambi Tate aruhe ngamu mu tjere okuhepa koviṅa avihe mena raMuhona wetu Jesus Kristus.” Ef.5:20.

ETWAKO ORITJATATU

ZEMBURUKA OKUYAPURA EYUVA RORUSUVO

81. Metwako ndi matu raerwa tjike?

Metwako ndi matu raerwa tu zemburuke eyuva rorusuvo.

82. Eyuva rorusuvo oriṅe?

Eyuva rorusuvo oro Esabata poo Osondaha, poo ngamwa eyuva enene nda yapurirwa orusuvo rokorutu norokomuinyo nda yapurirwa okuparura omuinyo.

“Nu Ndjambi wa sera eyuva oritjahambombari ondaya na yapura ro.” Gen.2:3. “Ungura omayuva hambouwwe, u mane oviungura vyoye avihe; nungwari eyuva oritjahambombari oro eyuva rokusuva nda yapurirwa Muhona, Ndjambi woye: ko nokuungura ko otjiungura mu ro, na ove omuini nandarire omuzandu woye nomukazona woye nandarire omukarere woye omuzandu nomukarere woye omusuko, novinamuinyo vyoye nandarire omuyenda woye ngu ri motjirongo tjoye.” Eks.20:9,10.

83. Ndjambi ongwae tji ma tja: “Zemburuka”?

Ndjambi ma tja: Zemburuka, orondu Eye ma vanga eṭe tu unguṛe omayuva aehe inga hamboumwe woviungura, tu unguṛe oviungura vyetu atuha tu otjirweyo, nungwari tu zemburuke eyuva rorusuvo ndi maari ya eṭe tu ri tunine ro oku ri yapura.

84. Eyuva rorusuvo matu ri yapura vi?

Eyuva rorusuvo matu ri yapura:

- 1) tji matu ri tjevere koviungura imbi mbi vi unguṛwa momayuva woviungura,
- 2) tji matu paha omambo waNdjambi inga nge ri oviparure vyokomuinyo,
- 3) nominyo vyetu vi kare mwa imbi vyaNdjambi.

“Norukwao Muhona wa hungira ku Moses a tja: Raera kOvaisrael nu itja: Ege, tjiri takamiseye Esabata randje, orondu otjo otjiraisiro tjomerikutiro pamwe pokati kaAmi na ege nozondekurona zegu, ovanu ve tjiwe kutja oWami, ngu mbi ri Muhona, ngu mbe mu yapura.” Eks.31:12,13.

85. Oviparure vyokomuinyo ngatu vi pahe vi?

Ovipaure vyokomuinyo matu vi paha tji matu lesa natu puratene omambo waNdjambi nokukumba nokutanga Ndjambi nomaimburiro wetu.

“Otja ounatje ounyame punga au zera omaihi ege wina opunga amwa sokuzera omaihi omakohoke wembo raNdjambi, kokutja mokuyenwa ege mu kare nu arire tji mwa yamwa.” 1 Pet.2:2.

86. Metwako ndi oritjatatu matu raerwa atuha tjiti tjike?

Metwako ndi oritjatatu matu raerwa atuha nyengura eyuva enene nda yapurwa i Ndjambi, eṭe wina atuha nyengura omambo waNdjambi nomazuvarisiro wao, atuha nyengura

okuyorongana kovandu poŋa pu ve hongwa omambo waNdjambi.

“Atu isa okuyenda kozombongarero zombongo otja tjiva tjinga ave tjita; nungwari ngatu pandiparisasane okuyenda ku zo, tjinga amamu munu kutja Eyuva raMuhona ri ri pokuya.” Heb.10:25. ”Zuveye kovanene veŋu nu mu riwise kehi yawo. Owo ve tjevera ominyo vyeŋu nokuhinarusuvo, tjinga amave sokuyandja omerizerira woviungura vyawo ku Ndjambi. Tji mamu zuu ku wo, indino owo mave ungura oviungura vyawo nenyando; tji mu hi nokutjita nao, owo mave vi ungura noruhoze, notji pe hi nokumuvatera.” Heb.13:17.

87. Omambo waNdjambi ngatu ye puratene vi?

Omambo waNdjambi ngatu ye puratene nondjoroka nongamburiro noupenda nokukumba kuNdjambi, Ndjambi Eye sere ondaya mominyo vyetu, tu ye puratene, eŋe tu kare nombango yokuyelesa oveni.

ETWAKO ORITJAINÉ

**YOZIKA IHO NA NYOKO KUTJA U KARE NOUŊINGANDU
NOMUINYO ORURE KOMBANDA YEHI.**

88. Metwako ndi oritjaine Ndjambi me tu raere tjike?
Metwako ndi oritjaine Ndjambi me tu raere tu yozike ovanene vetu.

89. Ovanene vetu oowani?

Ovanene vetu owo ootate noomama imba mbe tu kwata, nootateivi noomamaivi novatumbe vetu nozomiŋiri zetu mozoskole novahonge womambo waNdjambi novahona vovirongo ozosoromana nooveni vozonganda novandu avehe ovanene.

90. Ovanene vetu ngatu ve yozike vi?

Ovanene vetu ngatu ve yozike nokuzuva kuwo nokurusuparisa nokuveungurira nenyando nokuvesuvera nomutima ouhe.

“Omuzandu u yozika ihe, nomukarere u yozika omuhona we.” Mal.1:6. “Zuva ku iho ngwe ku kwata, nu o nyengura nyoko moukurukaze we.” Omia.23:22. “Yozika iho na nyoko oro ondi ri etwako ri nomakwizikiro.” Ef.6:2. “Vanatje, kareye nonduviro kovanene veṅu mu avihe, orondu tjinga ape tjata ku Muhona. Vakarere, kareye nonduviro kovahona veṅu vokombanda yehi. Amu ungurire kutja owo ve mu mune, nokutja eṅe mu ritjatise ku wo, nungwari unguṛeye nomitima omisemba mena rondira ku Muhona.” Kol.3:20,22. “Zuveye kovanene veṅu nu mu riwise kehi yawo”. Heb.13:17. “Omundu auhe nge riwise kehi youhonapare. Orondu kape nouvara mbu ha zu muNdjambi; nu inga omauvara nge ri po ya tuwa po i Ndjambi.” Rom.13:1.

91. Metwako ndi Ndjambi me tu raere atuha tjite vi?

Metwako ndi Ndjambi me tu raere atuha nyengura natu ha pindikisa ovanene vetu natu heve tjitisa omitima omivi.

“Ousemba u tongamisa otjiwaṅa; ourunde owo ondjambi kotjiwaṅa ngamwa atjihe.” Omia.14:34.

92. Moviṅa avihe ngatu zuve kovanene vetu?

Ngatu zuve kovanene vetu moviṅa avihe imbi mbi he ri ombikameno nombango yaNdjambi novikaro ovisemba.

“Omundu wa sokukara nonduviro ku Ndjambi komeho yokukara nonduviro kovandu.” Oviu.5:29.

93. Ndjambi ma kwizikire tjike ovandu imba mbu mave yenenisa etwako ndi?

Ovandu imbo mbu mave yenenisa etwako ndi Ndjambi me ve kwizikire ondaya ombwa nouṅingandu nomuinyo omure.

ETWAKO ORITJATANO

KO NOKUZEPA KO.

94. Omuzepe owa?

Omuzepe omundu auhe ngu ma zepa poo ma zepaisisa omundu poo me mu tatumisa korutu poo komuinyo, poo me mu tataizisa, a tataize, poo me mu putarisa memu nyonisa, wina nomuzepe eye ingo me rizepa.

“Nungwari nambano Ami me mu raere kutja auhe ngwa pindikire omukwao uriri ma etwa kotjombanguriro, nu auhe ngu ma tja omukwao otjina tjakauriri ma etwa komurungu wOtjira tjOvajuda, nu auhe ngu ma tja omukwao eyova otjiporoporo ma verwa nomuriro wotjovasengwa.” Mat.5:22. “Ingwi ngu ma tondo omukwao eye omuzepe, nu mamu tjiwa kutja omuzepe auhe ngamwa kamaa rumata omuinyo waaruhe.” 1Joh.3:15. “Nu auhe ngu ma putarisa umwe waimba ovaṭiti mba mba kambura mu Ami, itja rira kokuwa tjinene ku ye, ewe enene rotjikweyero tji ra kutwa mosengo ye, nu a ṭomwinisiwa mourekoto womeva kokuvare.” Mat.18:6

95. Ndjambi me tu raere tu kare vi nomundu omukwetu?

Ndjambi me tu raere, omundu omukwetu tu mu suvere, tu mu vatere, tu mu yame korutu nokomuinyo.

“Nungwari nambano Ami me mu raere kutja suvereye ovanavita na ege nu mu kumbire imba mbe mu tatumisa.” Mat.5:44.

96. Omukwetu owa?

Omukwetu eye omundu ngamwa, kutja tu mwi poo katu mwi, kutja omutumbe poo omusyona, kutja otjirumbu, poo omuzorundu, kutja ombara, poo omundu wauriri, kutja epanga retu, poo omunavita na eṭe, orondu atuhe oweṭe ovazamumwe, orondu atuhe twa utwa i Ndjambi atu kuturwa kuJesus Kristus.

“Nu pomundu umwe Eye wa utire po omihoko avihe vyovandu, nu e vi turisa mouye auhe.” Oviu.17:26.

ETWAKO ORITJAHAMBOUMWE

KO NOKUKATUKA KO ORUKUPO

97. Etwako ndi mari nyonwa vi?

Etwako ndi mari nyonwa momeripuriro nomomambo nomoviungura, omundu tji ma kara nomeripuriro worukatuko momuinyo we, poo ma hungire omambo worukatuko poo ma katuka orukupo norutu.

“Iseye otuvakiro! Ouvi ngamwa auhe omundu mbu ma tjiti kau tunu korutu rwe, nungwari omundu ngu vakira eye u tjita ouvi korutu rwe omuini.” 1Kor.6:18. “Auhe ngu ma tara komukazendu noruhuro eye wa tura ondjo yokukatuka orukupo na ye momutima we.” Mat.5:28. “Tjiri, me raere epe kutja omurumendu ngu ma isa omukazendu we potjiņa tji tji he ri oruvakiro na kupu omukazendu warwe, eye ma katuka orukupo.” Mat.19:9.

98. Ndjambi metwako ndi me tu raere tu kare vi?

Metwako ndi Ndjambi me tu raere tu kare ovakohoke, twa kohoka mominyo vyetu, epe tu yapure otutu twetu, tu kare kokure nouvi imbwi wotuvakiro, notukupo tu yozikwe i ovandu avehe.

“Ndjambi u vanga kutja mu rire ovayapuke, nokutja mu ritjaere oparukaze koruvakiro. Omurumendu auhe u sokutjiwa kutja ma sokuhupa mouyapuke na mondjozikiro komukazendu we, nu kamomananukiro wozonduma otja ovanavisenginina mbe ha tjiwa Ndjambi.” 1Tes.4:3-5. “Orukupo ngaru yozikwe i avehe, novakupasane ngave karasane nouřakame. Ndjambi u pangura ovavakirasane novakatuke votukupo.” Heb.13:4. “Ihi tji tja kutwa kumwe i Ndjambi ape ha ningi omundu ngu me tji haņa.” Mat.19:6.

ETWAKO ORITJAHAMBOMBARI

KO NOKUVAKA KO

99. Metwako ndi oritjahambombari Ndjambi me tu raere, atuha tjiti vi?

Metwako ndi oritjahambombari Ndjambi me tu raere, atuha vaka.

100. Ourunga u ri pengapi?

Ourunga u ri opengi. Omundu ma vaka tjinangara:

- 1) mai sa po mourunga na horeke otjina, tji tji heri otje omuini.
- 2) ma pundu ovandu ovina vyawo;
- 3) ma tjiti ovineya momarandasano;
- 4) ma piza ovina mbi he ri vye omuini;
- 5) ma ungura oviungura vye notjirweyo poo ma ungurire omeho;
- 6) ma pandere pondjambi yovaungure ve indji ndji ve sokupewa.

“Oukorokope wotjimariwa owo omuze wourunde ngamwa auhe.” 1Tim.6:10. “Omundu nguya vaka, a ha vaka rukwao, nu nga ute okuungura e rimwine omuini ondjambi ombwa, nu a yenene okuvertera ovasyona.” Ef.4:28. “Ko nakuinikiza ko omundu omukweu poo okupunda ovina vye. Ko nokuwombisa ko ondjambi yomuungure nga komuhuka weyuva rarwe.” Lev.19:13. “Nu ape ha ningi omundu ngu ma tjiti ouvi novineya komukwao. Ete twe mu raera rukuru nu twe mu ronga oukukutu kutja Muhona u vera imba mbe ri nao.” 1Tess.4:6. “Yandjeye ovyombara kombara, nu imbi ovaNdjambi mu yandje ku Ndjambi.” Mat.22:21.

101. Matu raerwa i ye metwako ndi mokuhungira ovina vyovakwetu?

Mokuhungira ovina vyovakwetu matu raerwa, ovakwetu tu ve vatere okutakavarisa nokuakamisa owini wao.

“Sekirisasaneye nokuhinomaunaunino. Auhe nga ungurise otjiyandjewa tja pewa i Ndjambi kouwa wovakwao. Komuhingo mbwi eye ma rire omutye omuwa woviyandjewa pekepeke vyaNdjambi.” 1 Pet.4:9,10.

102. Tu se okukara vi nowini wetu?

Owini auhe owaMuhona, ete twa pewa tu ungurise wo tjina

ovazandu ovaṭakame tu yozike Ndjambi nokurivatera nokuvatera ovakwetu nowini wetu.

“Ouye na avihe mbi ri mu wo ovyamuḥona.” Eps.24:1. “Ngamwa ngu ri omuṭakame moviṇa oviṭiṭi, ma rire omuṭakame movinene wina.” Luk.16;10.

ETWAKO ORITJAHAMBONDATU

KO NOKUHUNGIRA KO OMUKWENU OMAHONGONONENO WOVIZEZE

103. Etwako oritjahambondatu mari tja vi?

Etwako ndi mari tja:

- 1) Mukwenu o mu raere ovizeze;
- 2) Mukwenu o mu raere omambo omavi, o mu hungire omaraka omavi.
- 3) O hongononene ovandu omambo inga ngu mwa hungira mongumumu nomukwenu.
- 4) O hongonona omambo nge he ri omawatjiri.
- 5) O hongonona omambo we ye zuva kovandu
- 6) O hongonona omambo ove koraererwe uke ye hongonone.

NUNGWARI

- 1) Mukwenu muri purira nawa, ove u mu hongononene mouwa,
- 2) mukwenu mu hungirira mouwa tji ma kumininwa, poo tji ma hungirwa navi,
- 3) omambo woye aruhe ngaye rire omasemba nomawatjiri,
- 4) tji wa zuu omambo omavi mae hongononenwa ovandu, ye undika.

“Omuryangise wozohukutu kamaa horeke oviundikwa. Humburuka nomundu ngu nyomborora tjinene.” Omia.20:19. “Iseye ourunde ngamwa auhe; nu iseye ovineya notjavivi neruru nozohukutu azehe.” 1Pet.2:1. “Nu me raere ege kutja mEyuva rOmbanguriro auhe ma yandja omerizirira otja komambo we womungandjo nga hungurire.” Mat.12:36. “Omuhongonone omunavizeze ka kara nokuhinokuverwa; omundu ngu nyomborora ovizeze ma tu.” Omia.19:9. “Opu mwa sokuisa okukora ovizeze, auhe nga hungire ouatjiri komukambure omukwao, atuhe pamwe tjinga atu ri ounepo morutu rwaKristus.” Ef.4:25.

104. Okukuminina novizeze vi za pi? Okukuminina novizeze vi za kuSatan.

“Satan omuzepe okuza kombutiro, nu keya rora okuungurira ouatjiri, mu ye tjinga amu hi na imbwi ouatjiri. Tji ma kora ovizeze, u tjita imbi porwavyo mbye mu pwira, tjinga e ri omunavizeze ne ri ihe yovizeze avihe.” Joh.8:44.

ETWAKO ORITJAMUVYU NORITJAMURONGO

KO NOKUNANUKIRA KO ONDJUWO YOMUKWENU. KO NOKUNANUKIRA KO OMUKAZENDU WOMUKWENU, NOMUKARERE WE OMUSUKO, NANDARIRE ONGOMBE YE NOKASINO KE NA NGAMWA ATJIHE OMUKWENU TJE NA TJO.

105. Momatwako inga yevari Ndjambi me tu raere atuha kara naye?

Momatwako inga yevari Ndjambi me tu raere atuha kara neruru, imwi mu mamu zu ozonduma zokuteruru novandu notutumbo twao.

“Nungwari omundu u rorwa, indu tji ma twarwa na hemenwa i ozonduma ze omuini zourunde. Nozonduma ze zourunde tji ze urisiwa ze kwata ouvi, nouvi tji wa yenenisiwa u kwata ondiro.” Jak.1:14,15.

106. Momatwako inga Ndjambi me tu raere, tu kare vi?

Momatwako nga oritjamuvyu noritjamurongo Ndjambi me tu raere: tu zepe, tu isemo ohukutu nomeripuriro omavi mominyo vyetu, eṭe tu kare twa yenena novina mbi tu na vyo eṭe tu suvere ovakwetu, nu ve kare novina vyao.

“Nungwari nambano mamu sokukoza ozonguma zouye nḡe ri mu eṅe; okutja ombakirasano, ouhakohoke, omananukiro wonyama, ozonguma ozombi noukorokope, orondu oukorokope wa sana nokukarera ovisenginina.” Kol.3:5. “Nu okukarera Ndjambi, tjiri, ku yandja outumbe komundu ndovazu eye u nohange na imbi mbye na vyo.” 1Tim.6:6.

107. Etwako indi enene okukapita omatwako aehe orine?

Etwako indi enene nda ka pita omatwako omakwao aehe, nu wina nda enenisa omatwako aehe oro:

“Suvera Muhona Ndjambi woye nomutima woye auhe, nomuinyo woye auhe, nozondunge zoye azehe, nomasa woye aehe! Netwako oritjavari nda sana na ro oro ndi: Suvera omukweṅu otja tji we risuvera omuini.” Mark.12:30,31. “Amu kara nondjo yomundu posi yainga omasuverasano. Ngu ma suvere omukwao eye ma yenenisa Omatwako aehe waNdjambi.” Rom.13:8.

108. Omatwako we nga aehe Ndjambi me ye tjere vi?

Omatwako we nga aehe Ndjambi me ye tjere: Eye omuyapuke nependa, ma vanga omatwako we nga aehe ye enenisiwe, ingwi ngu mae nenisa wo eye ma serwa ondaya a munu ouningandu wokomuinyo, nungwari ingwi ngwe hi na ku yenenisa omatwako aehe nga ma verwa nomberero yomazenge waaruhe woheli.

“Tjita nao nu mo kara nomuinyo.” Luk.10:28.

109. Oune ngu ma sora okuyenenisa omatwako aehe waNdjambi?

Kape na omundu nandarire umwe ngu ma sora okuyenenisa.

“Avehe va poka ku Ndjambi, avehe va zundaka; kape na umwe ngu tjita ouwa, nangarire umwe ke po.” Rom.3:12. “Nungwari ami owami omundu ngu mbi ŷa, ngu mba randisiwa kouvi otja omukarere.” Rom.7:14. “Moruveze ndwa kapita eŷe mwa kokere, tjinga amu ha ri nonɖuviro ku Ndjambi nu tjinga amwa tjitire ouvi.” Ef.2:1.

110. Tjaa tu hiya yenenisa omatwako waNdjambi, twe ri ungurira ye?

Twe ri ungurira omberero, tja tu hiya yenenisa omatwako waNdjambi.

“Nga sengwe ngamwa auhe ngu hi nokukara nonɖuviro komambo aehe nga tjangwa mEmbo rOmatwako.” Gal.3:10. “Omundu ngwa tjiti omauvi ongwa sokuŷa.” Hes.18:4.

111. Atuha ka verwa numberero yaaruhe, ngatu tjitevi?

Atuha ka verwa numberero yaaruhe, ngatu pahe ombatero nongutukiro.

112. Ndjambi we tu peraye oveta ye, nu eŷe katu na okusora okuyenenisa yo?

Ndjambi we tu pa oveta ye i tu raere ombango ye oyo wina i tu urikire imba pu twa tataiza nu i tu raere kutja oweŷe ovanazondjo novapindikirwa, wina oyo i tu ninikize okupaha ombatero nongutukiro.

“Indji ondando yOmatwako ooine? Owo ya wezirwa okuraisa kutja omasa wouvi ye ŷeki pi. Owo ya tjerwa okukarerera nga kondekurona yaAbraham, ku kwa tjitirwa inga omakwizikiro, tji ye ya.” Gal.3:19. “Inga Omatwako waMoses ya wezirwa ko kokutja omakatukiro ye takavarere ko.” Rom.5:20. “Ami hitje tjiwa kutja ouvi otjikeŷa, andakuzu Omatwako kaye ndji tjivisire. Ami hitje tjiwa kutja okunanukira otjiŷa ondjo, andakuzu Omatwako kaye tjere: Ko

nakunanukira ko otjina tjomukweŋu.” Rom.7:7. “NOMatwako ye tu tjevera tjinene nga Kristus tje ya, kokutja eŋe tu varwe otja ovasemba komurungu waNdjambi mena rongamburiro.” Gal.3:24.

113. Ombatero nonguturiro ngatu i pahe ku uŋe?

Ombatero nonguturiro matu i paha ku Jesus Kristus, ingu ngwetu yenenisira Omatwako waNdjambi inga nga yenenisa na ye tu kutura momberero ombi.

“Ndjambi we tji yenenisa. Eye wa pangura ouvi mongaro yetu otja mbu tu ri ovandu mokuhinda Omuna we momuhapo ohamukwao na imbwi wongaro youvi womundu, kokutja a ise po ouvi.” Rom.8:3. “Nungwari oruveze Ndjambi ndwa twire po tji rwe ya, Eye otja hinda Omuna we. NOMuna we ngwi wa kwatwa i omukazendu, nokuza kongwawero ye Eye wa kara kehi yOmatwako waMoses, kutja a rande nu a kuture imba mba ri kehi yOmatwako nga, kokutja eŋe tu isirwe po ovanatje vaNdjambi.” Gal.4:4,5. “Kristus we tu randa kutja e tu kututure kosengi ro ndja etwa i Omatwako, Eye tjinga a karirira eŋe osengi ro. Orondu Omatjangwa maye tja: Ngamwa auhe ngwa turikwa komuti nga sengwe!” Gal.3:13. “Notji pe hi nomberero yokuŋa ku imba mbe noruwano naKristus Jesus.” Rom.8:1.

EKONDWA ORITJATANO

NDJAMBI OMUNA NOVIUNGURA VYE

114. Ndjambi Omuna owani?

Ndjambi Omuna eye Jesus Kristus: Eye Omuna omukwatwa erike waNdjambi, Eye Ndjambi tjiri ngwa za muNdjambi Ihe, nEye omundu tjiri, ngwa kwatwa i omukazendu, Eye Muhona wetu nOmukuture wetu.

“Ouye ngunda au hiya memwa, indi Embo tjandje opu ri ri; Embo ndi ra kara pu Ndjambi, nEmbo ondi ri Ndjambi. Nu indi Embo nde ura notjari nouatjiri ra rira omundu nari tura mokati ketu.” Joh.1:1,14.

115. Ena indo Jesus mari tja vi?

Ena indo Jesus mari tja Omukuture.

“Eye ma panduka omuzandu, nove mo mu ruku Jesus, tjinga ama yama otjiwaga tje komauvi watjo.” Mat.1:21. “Ondjamo i za muJesus porwe, nu kape na ena rarwe nda yandjewa kovandu kombanda yehi arihe Ndjambi me vanga kutja a rire mu twa kuturwa.” Oviu.4:12

116. Ena indo Kristus mari tja vi?

Ena indo Kristus mari tja Omutwirisiwa.

“Ndinondi motjihuro tjaDavid ege mwa kwaterwa Omukuture, Eye ngu ri Kristus, Muhona!” Luk.2:11. “Mamu tjiwa Jesus waNasaret na indu Ndjambi tje mu twirisa nOmbepo Ondjapuke nomasa. Eye iya ryanga akuhe ama tjiti ouwa nama verukisa avehe mba ri kehi youvara waSatan, Ndjambi tjinga a ri puna Ye.” Oviu.10:38.

117. Oondjambi waJesus wa munika mutjike?

Oondjambi waJesus wa munika mongaro ye, momambo we nomoviungura vye.

“Ami naTate tuvemwe.” Joh.10:30. “OwAmi ondjira nouatjiri nomuinyo; kape nomundu ngu ma i ku Tate nokuhinaami!” Joh.14:6. “Tate, Ndjji pa ondjozikiro nambano komurungu woye, indji ondjozikiro ndji mba ri na yo pOve, ouye ngunda au hiya utwa.” Joh.17:5. “Ami mba pewa ouvara auhe meyuru na kombanda yehi.” Mat.28:18.

118. Omuna waNdjambi wa rira vi omundu?

Morusuvero rwe okutusuvera Kristus we risusuparisa narire omundu. Wa kwatwa kOmbepo Ondjapuke nokomusuko Maria.

“Ombepo Ondjapuke mai ya kombanda yoye, nomasa waNdjambi wokOmbandambanda maye ungora move.” Luk.1:35. “Nowo ngunda ave ri moBetlehem, omayuva we wombandukiro arire tji ya yenene. Neye wa panduka omuatje we omuzandu everi, e mu manga mozonguyu nu e mu rareke metemba rozonyanda, owo tjinga ave ha ri noruveze mondjuwo yovayenda.” Luk.2:6,7. “Eye aruhe wa ri mongaro yaNdjambi, nungwari ka pandereke pokuripura kutja u ũeki pu Ndjambi. Moruveze rwanao nombango ye omuini Eye we risusuparisa na kambura ongaro yomukarere. Eye wa rira omundu, na munika momuhapo womudu.” Fil.2:6,7.

119. Jesus wa kwaterwa pi?

Jesus wa kwaterwa moBetlehem, mehi rOvajuda.

120. Jesus tja kwatwa omouye waune?

Jesus wa kwaterwa mouye wombara Herodes.

“Jesus wa kwaterwa motjirongo Betlehem mehi raJudea, moruveze ndwi Herodes tja ri ombara. Tjimanga kombunda yanao ovarumendu tjiva ovatjiwe vozonyose ve ere koJerusalem okuza komuhuka.” Mat.2:1.

121. Otjiungura tjaJesus tja hindirwa tja ri tjaye?

Otjiungura tjaJesus tja hindirwa otjonguturiro.

122. Jesus wa kutura oune?

Jesus wa kutura ovandu avehe.

123. Jesus we tu kutura muye?

Jesus we tu kutura momasa waSatan nomourunde nomomberero yoveta nomonđiro nomombandjarero yaruhe.

“Novanatje mba tjinga ave ri ovandu vonyama nombinđu, Jesus omuini otjinga a rira omundu otja wo. Ihi wa tjitira kutja omonđiro ye Eye a yandekingwi ngu nomasa okuzepa ovandu, okutja eye ngwi Satan, nu komuhingo mbwi kutja Eye a kuture imba mba kara mouhuura ngunda ave nomuinyo, mena rokutira onđiro.” Heb.2:14,15. “Ondjona yaNdjambi, ndji isa ko ozondjo zouye, oyo ndji.” Joh.1:29. “Kristus we tu randa kutja e tu kuture kosengiro ndja etwa i Omatwako, Eye tjinga a karirira eje osengiro.” Gal.3:13. “Ami mba vanga okuyama otjiwana hi kotjovakoke nokutjivatera komasa wonđiro.” Hos.13:14

124. Jesus we tu kutura naye?

Jesus we tu kutura nombinđu ye ondjapuke nokutatumisiwa kwe nokuṭa kwe e hi na ozondjo.

“Orondu eṅe mamu tjiwa indji ondjambi, ndji mwa sutwa na yo okukuturwa kongarero yomungandjo ndji mwa rumata pooihe mukururume. Oyo kaya ri ondjambi ndji nyonoka uriri tjimuna osilveri

nongoldo. Ege mwa kuturwa nombinđu onđu yaKristus ngwa ri otja ondjona, ndji hi notjipo nu ndji hi nomaŋi?" 1Pet.1:18,19. "Eye wa hitire rumwe uriri nombinđu ye omuini ne tu etere onguturiro yaaruhe." Heb.9:12.

125. Jesus we tu kutururira tjike?

Jesus we tu kutura, kutja eŋe tu rire ovandu ve ovaŋingandu.

"Kristus ke na pa tjitire ouvi, nungwari Ndjambi we Mu tjita otja omunauvi motjimbe tjetu, kokutja eŋe moruwano na Kristus, tu sore okuisirwa i Ndjambi." 2Kor.5:21. "Omuna wOmundu, Eye ke ere okukarerwa, nungwari we era okukarera nokuyandja omuinyo we u rire onguturiro yovengi." Mat.20:28. "Neŋe ngamu tje okuhepa nenyando ku Tate, ngwe mu pa omasorero okukara norupa motjirumatwa tji tja tuninwa ovakambure mouhona wondjererera. Eye we tu yama kouvara wondorerera ne ketutwa mouhona wOmuna we omusuverwa." Kol.1: 12,13.

126. Ngunda Jesus ehi ya yenenisa otjiungura tjonguturiro, wa ri u ungura tjike?

Jesus wa ri a verukisa ovavere, a pendura ovakoke nokuzuvarisa evangeli rouhona waNdjambi

127. Jesus wa ŋa vi ?

Jesus wa paperwa kotjikoroise.

"Tji ve ya poŋa puyape isanewa kutja OpOtjikongo tjOtjiuru, arire tji ve mu papere kotjikoroise." Luk.23:33.

128. Oouŋe mbe mu paperisa kotjikoroise?

Ovajuda mbe mu paperisa kotjikoroise.

129. Omena raye tji ve mu paperisa kotjikoroise?

Ve mu paperisa kotjikoroise, orondu va ri mave ŋeruru naye nave mu ŋire omazenge mena romambo we wowaŋjiri.

130. Jesus wa paperwa kotjikoroise mouye waune?

Jesus wa paperwa kotjikoroise mouye waPontius Pilatus.

131. Jesus tja paperwa kotjikoroise, wa t̄ira ye?

Jesus wa t̄ira ozondjo zetu.

“MuKristus omu twa muna onguturiro yozondjo.” Kol.1:14. ”Omuna wOmundu, Eye ke ere okukarerwa nungwari we era okukarera nokuyandja omuinyo we u rire onguturiro yovengi.” Mat.20:28. “Jesus wa isanena imba ovahongewa omurongo na vevari peke, na tja ku wo: Purateneye! Matu i koJerusalem nambano, nu oku maku kayenenisirwa oviḡa avihe ovaprofete mbi va tjangera Omuna wOmundu. Eye ma yandjewa ku imba mbe ha tjiwa Ndjambi, nowo mave Mu nyekerere, ave Mu yamburura nave Mu t̄ekere omate. Mave Mu tono nu mave Mu zepa, nungwari meyuva oritjatatu Eye ma penduka.” Luk.18:31-33. “Indino Jesus wa t̄jere ku wo: Oweḡe omayova uri, nu mu toora orure okukambura momambo aehe, nga hungirirwe i ovaprofete! Kristus ka sere okuhihamisiwa nai are, nu a rire pa hitire mondjozikiro ye? Nu Jesus we ve pangununa omambo nga hungirirwa Ye omuini mOmatjangwa aehe, ama utire pomambo waMoses nomatjangwa wovaprofete avehe.” Luk.24:25-27.

132. Jesus tja koka wa rarisiwa pi?

Jesus tja koka wa rarisiwa meyendo.

133. Oowaḡi mbe mu paka?

Wa pakwa i Josef Omuarimatea naNikodemus.

134. Ve mu paka pi?

Ve mu paka meyendo epe raJosef, nda kororerwe moruuwa orukukutu, nu mu mu hi na mwa pakerwe omundu.

135. Jesus wa pakerwa ye?

Jesus wa pakwa, a munike tjiri kutja wa t̄a, nokukara kwe meyendo kwe tu yapurira omayendo wetu, ye rire oruveze rwokusuvira mo.

136. Omena raye Jesus tja i mehi motjovakoke?

Jesus wa ya mehi motjovakoke a tjivise ovanamuinyo novakoke, Eye ngu ri Omukuture, ngwataara Satan nomasa aehe woheli.

“Eye wa teya omasa wouhonapare nowouvara wozombepo ozombi, nu we ze raisa komurungu wovandu mokuzetwara otja ovakamburwa morukosi rwondogeno rwaKristus.” Kol.2:15. “Ondiro ya yandekwa, noutongi wa yenenisiwa! Ndiro, outongi woye u ri pi? Ndiro, omasa woye wokuzepa ye ri pi? Nungwari ete matu tja okuhepa ku Ndjambi ngu tu pa outongi mu Muhona wetu Jesus Kristus!” 1Kor.15:54,55,57. “Kristus wina wa tira omauvi porumwe uriri, ingwi omuhinandjo wa tira ovanandjo kokutja e mu tware ku Ndjambi. Eye wa ta otja omundu na rire omunamuinyo mOmbepo yaNdjambi. Nu momasa wOmbepo ndji Eye wa kazuvarisira ozombepo, nda ri mondeko Ombuze Ombwa.” 1Pet.3:18,19.

137. Jesus wa penduka motjovakoke meyuva oritjangapi?

Jesus wa penduka motjovakoke meyuva oritjatatu.

“Kristus wa tira omauvi wetu, pungu apa tjangwa mOmatjangwa; Eye wa pakwa nu a pendurwa movakoke meyuva oritjatatu, pungu apa tjangwa mOmatjangwa.” 1 Kor.15:3,4.

138. Jesus tja penduka tja zu meyendo wa ri norutu ndu ri vi?

Jesus tja penduka wa ri norutu orukenakene rwombepo.

“Otjinga ape ri nao nombendukiro yovati: Orutu tji rwa pakwa, okutja rwa tu, nu tji rwa pendurwa karu uhara amaru tu. Orutu tji rwa pakwa ru ngundipara naru zundaka; nu tji rwa pendurwa ru hara omasa noupwe. Norutu tji maru pakwa orwo orutu rroundu, nu tji rwa pendurwa orwo orutu rwombepo. Nu tjinga ape norutu rroundu, wina otjinga ape sokukara orutu rwombepo. Orundu Omatjangwa maye tja: ‘Omundu ngwi omutenga Adam wa utirwe omunamuinyo’; nungwari Adam ingwi omusenina eye Ombepo ndji yandja omuinyo. Orutu ndwi rwombepo kandu ri orutenga, nungwari orwo ndwi rroundu, nu tjazumba a rire ndwi rwombepo. Nu Adam ingwi omutenga wa memwa pehi, neye owehi, nu Adam ingwi outjavari wa zira meyuru. Imba ovandu vehi ve ri otja ingwi Adam ngwa memwa pehi; nu imba veyuru ve ri otja ingwi Adam ngwa zira meyuru. Otja tjinga atwa zarere osaneno yomundu ngwa memenwe pehi, otjinga amatu zara osaneno yOmundu ngwi ngwa zira meyuru. Nu ihi tji me hee, vakwetu, otjo hi: Onyama nombindu kai nakusora okurumata ouhona waNdjambi. Nu ihi

otjiṭe katji nakusora okurumata ouhona waNdjambi. Nu ihi otjiṭe katji nakusora okurumata ihi otjiḥaṭa.” 1 Kor.15:42-50.

139. Jesus wa pendurirwa ye?

Jesus wa pendurirwa ousemba wetu, Eye tja penduka, eṭe tu kare tu na Omukuture ngwe nomuinyo, wina eṭe tu kare tu nomaundjiro wombendukiro yetu.

“Motjimbe tjomauvi wetu Eye wa yandjwa kokuṭa, nEye wa pendurwa komuinyo kokutja eṭe tu varwe otja ovasemba komurungu waNdjambi.” Rom.4:25. “Notja onḡiro punḡa aya etwa i omundu, ombendukiro yovakoke wina opunḡa amai etwa i omundu.” 1Kor.15:21. “Nu omotjimbe tjaNdjambi eṭe tji mu noruwano nao na Kristus Jesus. Kristus ku eṭe wa rira ounongo mbu za mu Ndjambi nouyapuke nongutukiro.” 1 Kor.1:30.

140. Kombunda yombendukiro Jesus kombanda yehi wa kara ko omayuva yengapi?

Jesus wa kara kombanda yehi omayuva omirongo vine kombunda yombendukiro ye.

“Oure womayuva omirongo vine kombunda yonḡiro ye Eye we riraisa ku wo potuingi momiano mbiyavi raisa ongahukiro kutja u nomuinyo. Owo ve Mu muna, nEye wa hungira ouhona waNdjambi kuna wo.” Oviu.1:3.

141. Kombunda yomayuva ngo omirongo vine Jesus wa ya pi?

Kombunda yomayuva ingo omirongo vine Jesus wa ronda na i keyuru.

“Nu tja za nokuhungira omambo nga, arire tja twarewa keyuru owo ngunda amave tarere, notjikamba tje Mu horeka natji Mu isa po komurungu wawo” Oviu.1:9. “Nu ngunda ame ve sere ondaya nao, arire tja zu po pu wo na toorwa okutwarewa keyuru.” Luk.24:51.

142. Jesus tja ronda keyuru, meyuru wa ka ungura ye? Jesus tja ronda keyuru wa yaruka kondjerera kondjozikiro

ye, tjazu mba a ka hindire ovahongwa ve Ombepo Ondjapuke, noku ka ungurira ovakambure ve oruveze nokukara me ve yama wina.

“Nungwari Ami me mu raere ouatjiri: Okokuwa ku ege Ami tji me i, orondu tji mbi ha ire, ingwi Omuvyonge ke nokuya ku ege.” Joh.16:7. “Eye wa hita meyuru orini kutja Eye a munikire ege komurungu waNdjambi.” Heb.9:24.

143. Nambano Jesus u ri pi?

Nambano Jesus u ri meyuru, wa rire omuyame wetu, nandarire u ri meyuru, Eye ope kara povakambure ve ngaa komaandero wouye, nandarire Eye ke nokumunika nomeho.

“Nu, tareye, Ami mbi ri puna ege omayuva aehe nga komaandero woye.” Mat.28:20. “Eye nga pendura na wo Kristus movakoke nu nge Mu haamisa na wo kokunene kwe meyuru.” Ef.1:20.

144. Mokuungura otjiungura tje tjonguturiro Jesus wa munika kutja omukwae?

Mokuungura otjungura tje tjonguturiro Jesus wa munika kutja Eye Omuprofete, Eye Omupristeri Omunene nOmbara

145. Jesus Eye Omuprofete vi?

Jesus eye omuprofete orondu:

- 1) we tu hororere ondjira yomuinyo,
- 2) we tu tjivisa ombango yalhe,
- 3) we tu pa omambo wEvangeli,
- 4) wa ziki ombongo yEtestamente Epe,

“OwAmi ondjira nouatjiri nomuinyo.” Joh.14:6. “Orondu Ndjambi wa suverere ouye tjinene nai nga tja yandja Omuna we omukwatwaerike, kokutja auhe ngu ma kambura muYe a ha pandjara, nungwari a kara nomuinyowaaruhe.” Joh.3:16. “Ombepo yaMuhona i ri kombanda yandje, orondu Eye we ndji toorora okukazuvarisira ovasyona ombuze ombwa. Eye we ndji hinda okukatjivisa ouyara kovapandekwa nokukamunisa ovapoŋu nokukayandja onguturiro kovatatumisiwa.”

Luk.4:18. "Tjiva we ve toorora okurira ovaapostele, tjiva okurira ovaprofete, tjiva okurira ovazuvarise vOmbuze Ombwa, tjiva okurira ovanene vombongo na tjiva okurira ovahonge." Ef.4:11. "Jesus wa tja nai ku wo: Twendeye mouye auhe, nu kazuvariseye Ombuze Ombwa kotjuitwa ngamwa atjihe." Mark.16:15. "Jesus wa tumbukire na tja ku wo: 'Ami mba pewa ouvara auhe meyuru na kombanda yehi. Otji mwa sokuyenda koviwaṅa avihe ngamwa akuhe mu kaise po ovandu ovahongewa vandje amamu ve papitisa mena raTate nOmuna nOmbeṅo Ondjapuke.'" Mat.28:18,19.

146. Jesus wa rire vi Omupristeri Omunene?

Jesus wa rire Omupristeri Omunene orondu we riyandja otjondjona yopaska na hiti mOtjouyapukeyapuke na yenenisa onguturiro, nambano u tu kumbira pulhe omayuva aehe.

"Kristus tja tuurungira mOndanda a kahite mOtjouyapukeyapuke, ka hitire mu tjo nombinḁu yozongombe noyozongominya, nungwari wa hitire rumwe uriri nombinḁu ye omuini ne tu etere onguturiro yaaruhe." Heb.9:12. "Kristus wina otjinga a punguhwa rumwe kutja a ise po omauvi wovengi." Heb.9:28. "Nombunguhiro imwe ndji Eye wa pwisa okumana imba mba kohororwa kouvi." Heb.10:14. "Owaṅi ngu me ve pangura? KaKristus Jesus! Eye wa ṅa, nu tjinene komeho Eye wa pendurwa movakoke, Eye u ri kokunene kwaNdjambi, nu u tu hekenena ku Ye." Rom.8:34. "Nungwari ngamwa ngu ma tjiti ouvi, eṅe tu nomuhungirirepo ku Tate. Eye oJesus Kristus, ingwi omusemba." 1Joh.2:1

147. Jesus Eye Ombara yaṅe?

Jesus Eye Ombara yozombara, Omuhona wovahona, Eye Ombara yeyuru nehi, Eye u pangera ovandu avehe noviutwa avihe.

"Ove we mu zika okuhonaparera oviṅa avihe mbi wa uta, we mu twa kombanda yoviutwa avihe mbi." Ps.8:6. "Ami mba twirisira ombara yandje kondundu yandje ondjapuke Sion." Ps.2:6. "Ami mba pewa ouvara auhe meyuru na kombanda yehi." Mat.28:18. "Orondu Kristus u sokuhonapara nga Ndjambi tja twa ovanavita na Ye avehe kehi yozombaze zaKristus." 1Kor.15:25.

“Eye ingwi Omunauhona omuwa nerike porwe, Ombara yozombara noMuhona wovahona.” 1Tim.6:15.

148. Ouhona waJesus mau yanda rune?

Ouhona waJesus kau na kuyanda ko mau kara nga aruhe.

“Ndjambi Eye Ombara kombanda yehi arihe, Mu imburireye eimburiro!” Ps.47:7. “Eye ma rire omunene, nu ma isanewa Omuna waNdjambi wOkombandambanda. Muhona Ndjambi me Mu pe otjihavero tjouhona tjaihe mukururume David, NEye ma honaparere ozondekurona zaJakob otja ombara nga aruhe, nouhona we kamaau yanda ko.” Luk.1:32,33.

EKONDWA ORITJAHAMBOUMWE

NDJAMBI OMBEPO ONDJAPUKE NOVIUNGURA VYE

149. Ombepo Ondjapuke owa?

Ombepo Ondjapuke oyo operona oitjatatu moundjambi, oyo wina oNdjambi tjiri, ndji za kuNdjambi Ihe, ndja hindwa i Ndjambi Omuna.

“NEye tje ya, indji Ombepo youatjiri, me mu hongorere mouatjiri auhe. Eye ke nokuhungira mouvara we omuini, nungwari ma hungire imbi mbi ma zuu ne mu raere oviņa mbi mavi ya.” Joh.16:13. “Neņe tjinga amu ri ovanatje, Ndjambi otjinga a hinda Ombepo yOmuna we momitima vyetu, nOyo i ravaere ai tja: ‘Aba’, okutja Tate.” Gal.4:6.

150. Ombepo Ondjapuke mai ungura tjike?

Ombepo Ondjapuke:

- 1) mai tu isana tu yende kuJesus, nai tu hirimanisa,
- 2) mai tu munine,
- 3) mai tu pe ongamburiro yokukambura mOmukuture wetu,
- 4) mai tu yapura nai tu pe omasa, tu rire ovanatje vaNdjambi ovayapuke,
- 5) mai zeuparisa ongamburiro yetu nai tu yama muyo,

- 6) omayuva ayehe mai tu isire ozondjo zetu,
- 7) neyuva esenina pu nalhe nOmuna mai tu pendura pu novakoke avehe
- 8) nai tu pe pu novakambure avehe omuinyo waaruhe.

“Eye we tu yama nu we tu isanena okurira otjiwaga tje.” 2Tim.1:9. “Ongamburiro otji i za momazuvarisiro omundu ngu ma zuu, nomazuvarisiro ngu tu zuva owo omazuvarisiro waKristus.” Roma.10:17. “Nungwari mwa kohororwa komauvi, mwa yapurirwa Ndjambi, nu mwa varwa otja ovasemba komurungu waNdjambi mena raMuhona Jesus Kristus na mena rOmbepo yaNdjambi wetu.” 1Kor.6:11. “Nu me tjiwa, tjiri, kutja Eye u nomasa okutakamisa nawa imbi mbya yandja ku ami nga kEyuva ndi Eye ndi me ya rukwao.” 2Tim.1:12. “NOmbepo yaNdjambi ngwa pendurire Jesus movakoke tji ya tura mu ene, indino Ingwi ngwa pendurire Kristus movakoke wina ma pendura otutu twegu otukoke komuinyo mOmbepo ye ndja tura mu ene.” Rom. 8:11. “Kape na ngu ma sora okuhongonona a tja: ‘Jesus Eye oMuhona!’, nokuhinokuhongorerwa i Ombepo Ondjapuke.” 1Kor.12:3.

151. Ombepo Ondjapuke oviungura vyayo mai ungurire pi mouye mbwi?

Ombepo Ondjapuke oviungura vyayo mai vi ungurire momitima vyovandu.

152. Ombepo Ondjapuke i ungura momitima vyovandu venge?

Ombepo Ondjapuke i ungura momitima vyovandu mbe na omambo nomasakramente waNdjambi.

153. Oviungurisepoo ovivatere vyOmbepo Ondjapuke mbye ungura navyo ovige?

Oviungurise poo ovivatere vyOmbepo Ondjapuke mbye ungura navyo oyo omambo waNdjambi nomasakramente omayapuke.

“Ombepo yaNdjambi ondji yandja omuinyo momundu. Omambo ngu mba hungire ku ene ye eta Ombepo yaNdjambi ndji yandja omuinyo.”

Joh.6:63. "Ingwi ngwa kambura na papitisiwa ma hupisiwa komuinyo."
 Mark.16:16. "Ingwi ngu ma ri onyama yandje na nu ombindu yandje u
 nomuinyo waaruhe." Joh.6:54.

154. Oowani mbe nomambo waNdjambi nomasakramente?

Omambo nomasakramente waNdjambi ye na ovakriste.

155. Ovakriste oowani?

**Ovakriste owo imba mba papitisiwa mena raNdjambi Ihe
 norOmuna norOmbepo Ondjapuke, nu wina ve
 nongamburiro, nu ve hongonona Ndjambivetatumwe.**

"Nu mena rongamburiro ndji mu Kristus Jesus ege amuhe owege
 ovanatje vaNdjambi, orondu ege amuhe mbu mwa wana na Kristus
 mombapitismo mwa sokukara nomuinyo otja mbu mu ri ovaKristus."
 Gal.3:26,27.

156. Otjimbumba tjovakriste matji isanewa vi?

**Otjimbumba tjovakriste matji isanewa ombongo ondjapuke
 poo ongerki ondjapuke yaKristus.**

157. Ombongo yaKristus i woronganisiwa i une?

Ombongo yaKristus i woronganisiwa i Ombepo Ondjapuke.

158. Omena raye ovandu tji ve hi na okuya oveni mombongo yaKristus?

**Ovandu kamaave sora okuya oveni, orondu owo kave na
 okutjiwa Ndjambi womawatjiri, ave tire momauvi, tjandje
 kave na ozondunge nomasa wokuya mombongo yaKristus.**

"Moruveze ndwa kapita ege mwa kokere, tjinga amu ha ri nonduviro
 kuNdjambi nu tjinga amwa tjitire ouvi." Ef.2:1. "Nu ngunda atwa
 ta mokuhinanduviro kwetu Eye we tu kitora komuinyo puna Kristus.
 Nu motjari tjaNdjambi ege mwa yamwa." Ef. 2:5. "Omundu ngwi ngu
 hi nOmbepo kamaa sora okuyakura oviyandjewa, mbi za kOmbepo
 Ondjapuke yaNdjambi. Ku ye ovyo oviporoporo. Eye wina

ke nokuvizuva nawa, ovyo tjinga amavi sasononwa komuhingo wOmbepo.” 1Kor.2:14.

159. Ovandu mave woronganisirwa tjike mombongo yaKristus?

Ovandu mave woronganisirwa mombongo yaKristus, kutja ve kurisiwe, nu ve hupisiwe momuinyo waaruhe.

160. Ovandu mave kamburwa vi mombongo, noukriste wawo mau zeuparisiwa vi mombongo?

Ovandu mave kamburwa mombongo, noukriste wawo mau zeuparisiwa i omasakramente omayapuke nomambo waNdjambi.

161. Ombongo yovakriste i ri pi?

Ombongo i ri mbo pu pe zuvarisirwa omambo waNdjambi, nu pu pe yandjerwa omasakramente omayapuke.

EKONDWA ORITJAHAMBOMBARI OMASAKRAMENTE NOMAMBO WANDJAMBI

162. Esakramente otjikeṅa?

Esakramente oro otjiungura otjiyapuke tjaNdjambi notjotjari tje, muro matu pewa ovina imbyo mbi munika, novina imbi vyokomuinyo imbi mbi ha munika, iho otjo otjari tjaNdjambi otjinene.

163. Tu na omasakramente yengapi?

Tu na omasakramente Omayapuke yevari: Esakramente rOmbapitisimo ondjapuke nEsakramente rOmariro Omayapuke.

1. ESAKRAMENTE ROMBAPITISIMO

164. Ounḡ ngwa twa po ombapitisimo?

Ombapitisimo ya twa po i Muhona wetu Jesus Kristus eyuva nda ronda a yaruka keyuru.

165. We ri twa po nomambo yene?

We ri twa po nomambo inga nge ri mevangeli raMateus inga ngu mae tja:

“Jesus wa tumbukire na tja kovahongewa ve: ‘Ami mba pewa ouvara auhe meyuru na kombanda yehe. Otji mwa sokuyenda koviwaga avihe ngamwa akuhe mu kaise po ovandu ovahongewa vandje amamu ve papitisa mena raTate nOmuna nOmbepo Ondjapuke. Nu ve hongeye okuřakamisa oviņa avihe mbi mbe mu raera. Nu, tareye, Ami mbi ri puna eņe omayuva aehe nga komaandero wouye.’” Mat.28:18-20.

166. Ovandu mave tjitwa vi kutja ve rire ovahongewa vaJesus?

Ovandu mave tjitwa kutja ve rire ovahongewa vaJesus tji mave papitisiwa mena raNdjambivetatumwe naave hongwa okuřakamisa omambo aehe waJesus.

167. Okupapitisiwa mena raNdjambivetatumwe maku he tjike?

Omundu tji ma papitisiwa mena raNdjambivetatumwe ndino:

- 1) Ndjambi Ihe me mu kambura, nomupapitisiwa ingwi ma kambura, ma rire omukriste;
- 2) Ndjambi Omuna me mu kohisa ombinđu ye, ne mu zarisa ousemba we;
- 3) Ndjambi Ombepo Ondjapuke me mu kwata rukwao komuinyo, a rire omundu omupe.

“Nu mena rongamburiro ndji mu Kristus Jesus eņe amuhe oweņe ovanatje vaNdjambi, orondu eņe amuhe mbu mwa wana na Kristus mombapitisiwo mwa sokukara nomuinyo otja mbu mu ri ovaKristus.” Gal.3:26,27.

168. Ombapitisiwo i noviņa vingapi?

Ombapitisiwo i noviņa vivari:

- 1) tjimwe tji tji munika, omeva;

- 2) na tjarwe tji tji ha munika, etwako raNdjambi nomambo we nomarakiza we.

169. Omarakiza ingo oye ne?

Omarakiza owo inga Jesus tji ma tja:

“Ingwi ngwa kambura na papitisiwa ma hupisiwa komuinyo, nungwari ingwi ngu hi na kukambura ma imbirahiwa.” Mark.16:16.

170. Otjiyandjewa tja tjike tji matu pewa mombapitisimo?

Mombapitisimo ondjapuke Ndjambi ma isapo ozongatukiro zetu, ne tu humburura monđiro nomomasa waSatan ne tu tjiti ovarumate womuinyo mbu ha yanda ne tu pe omasa kutja eṭe tu kare tu na omuinyo omupe.

“Jesus wa zirire a tja: Tjiri, me ku raere kutja omundu tje hi nokukwatwa momeva na mOmbepo, kamaa sora okuhita mOuhona waNdjambi.” Joh.3:5. “Nungwari imba tjiva mbe Mu yakura nave kambura mu Ye, Eye we ve pa ousemba okurira ovanatje vaNdjambi. Owo kaveya rira ovanatje vaNdjambi mokukwatwa otja ovandu tji ve kwatwa, okutja okukwatwa otja ovanatje mba za mu ihe omundu, nungwari Ndjambi omuini ongu ri Ihe yawo.” Joh.1:12,13. “Ege kamu nakutjiwa kutja eṭe atuhe mbu twa papitisiwa mu Kristus Jesus twa papitisiwa monđiro ye are? Tji twa papitisiwa twa pakwa puna ye, nu tu kara norupa monđiro Ye, kokutja Kristus pungu a pendurwa movakoke i omasa omanene walhe, eṭe wina a rire pungu atwa kara nomuinyo omupe.” Rom.6:3,4. “Nu tjinga atu ri ovanatje vaNdjambi wina matu rire ovarumate vozondaya Eye nga pwikira otjiwana tje. Nu matu rire ovarumate pamwe na Kristus vaimbi Ndjambi mbye Mu pwikira. Nu ndovazu tu norupa momahihamisiro waKristus, indino wina matu kara norupa mondjozikiro ye.” Rom.8:17.

171. Oouṅe imba mbu mave pewa ondaya indji yotjari?

Ondaya indji yotjari mai pewa, auhe ingwi ngu ma kambura, tjina Jesus mwini tji ma tja: “Ngu ma kambura mu Ami ma kara nomuinyo nangarire kutja wa tu.” Joh.11:25.

172. Omundu ingwi ngwa nyengura ondaya ndji yotjari ndja pewa mombapitisimo, eye a se po Ndjambi, mape ya a țirwa otjari?

Ii, omunamanyengu mape ya a țirwa otjari, tji nangara me ritwara ne ritanaura, Ndjambi me mu țire otjari mena raJesus Kristus.

“Neye otja sekama na yaruka ku ihe. Nu ngunda e ri kokure, ihe arire tje mu munu, nu a țondjenda na ye, a utuka, e rimanga mosengo ye ne mu ħupite.” Luk.15:20. “Ețe nandi tu he ri ovațakame Eye u kara omuțakame, țjinga e he ripatana omuini.” 2Tim.2:13. “Omurunde nga ise ozondjito ze ozombi nomeripuriro we omavi. Nga tanauke ku Muhona, Ndjambi wetu, Eye omunatjari nu wa tumba ondjesiro.” Jes.55:7.

2. ESAKRAMENTE ROMARIRO OMAYAPUKE

173. Omariro Omayapuke ya zikwa i uņe?

Omariro Omayapuke ya zikwa i Muhona wetu Jesus Kristus.

174. We ye zika ruņe?

We ye zika ouțuku mbwina tja horrorwa.

175. Omariro Omayapuke Jesus we ye zikira ooņe?

Omariro omayapuke Jesus we ye zikira ovakambure ve.

176. Omariro Omayapuke Jesus we ye zikira tjike?

Omariro Omayapuke Jesus we ye zikira:

- 1) okwisapo ozondjo.
- 2) oku mu zemburuka .
- 3) okuzeuparisa ongamburiro, ovakambure ve kare muYe nEye a kare muwo.

177. MOmariro Omayapuke matu pewa tjike?

MOmariro Omayapuke matu pewa omboroto, orutu rwaMuhona wetu Jesus Kristus, nomavinu ombinđu ye.

“Zemburukeye ihi otjinwino tjOmariro waMuhona wOngurova tji tu tjera okuhepa ku Ndjambi: otjo katji tu pe oruwano nombinđu Kristus ndja tirahira eṭe are? Nu zemburukeye indji omboroto ndji tu koyora: oyo kai tu pe oruwano norutu rwaKristus are?” 1 Kor.10:16. “Ingwi ngu ma ri onyama yandje na nu ombinđu yandje u nomuinyo waaruhe, nAmi me mu pendura movakoke meyuva esenina” Joh.6:54. “Ihi matji hee kutja aruhe tji mamu ri omboroto ndji namu nu motjinwino hi, eṭe mamu zuvarisa onđiro yaMuhona nga Eye tji mee ya.” 1Kor.11:26.

178. MOmariro Omayapuke oouṅe mbu mave pewa orutu nombinđu yaMuhona wetu Jesus Kristus?

MOmariro Omayapuke avehe imba mbu mave pewa wo, mave pewa orutu nombinđu yaMuhona, nungwari kaavehe imba mbu mave ri munine mo ondaya ombwa.

179. Imba mbe muna mo ondaya ombwa oowanji?

Imba mbu mave munu ondaya ombwa, owo imba mba kambura muJesus Kristus nomomambo we inga: Ihi orutu rwardje maru yandjerwa eṅe, indji ombinđu yandje mai tirahirwa eṅe yokuisa pa ozondjo.

180. Ovandu imba mbu mave i kOmariro Omayapuke ave hiya pwa, mave ri riré, nu mave rinwine tjike?

Ovandu imba mbu mave i kOmariro Omayapuke ave hiya pwa mave ririre, nu mave rinwine ombanguriro.

“Auhe ngu ma ri omboroto ndji na nu otjinwino tjaMuhona momuhingo mbu ha sere, eye ma tura ondjo korutu na kombinđu yaMuhona. Orondu ingwi ngu ma ri na nu e hi nakutjiwa katjotjiri kutja indwi orutu rwaMuhona, eye me rietere omuini ombanguriro, tji ma ri nokunwa.” 1Kor.11:27,29.

181. Ngatu tjite vi kutja tu pwe okunwa Omariro Omayapuke?

Tu pwe okunwa Omariro Omayapuke:

1) ngatu ripure eṭe oveni, kutja ominyo vyetu

nongaro yetu i ri vi, tjazu mba tu hongonone omauvi wetu;

- 2) tu kambure tjiri, kutja ozondjo zetu twa isirwa zo;
- 3) tu yandje ondjesiro ku imba mbu tu na oviposa kumwe;
- 4) tu kumbe, ku Ndjambi e tu vatere ongaro Eye ndji ma vanga;
- 5) tu vange okuritjaera kouvi, nokurira ovakriste vatjiri.

182. Ondaŷa ombwa indji ndji matu munu mOmariro Omayapuke oiŷe?

Ondaŷa ombwa ndji matu munu mOmariro Omayapuke oyo ndji:

- 1) matu zeuparisiwa ongamburiro yetu, nomaundjiro wetu wombendukiro nowomuinyo waaruhe;
- 2) matu takamisa okukara muJesus Kristus Omukuture wetu;
- 3) matu munu omasa okutonda ouvi nokusuvera Ndjambi, nokuzikama moukriste wetu.

“Ingwi ngu ma ri onyama yandje na nu ombinđu yandje ma kara mu Ami, naAmi e kara mu ye. Tate omunamuinyo we ndji hinda, naAmi mbi nomuinyo mu Ye. Nu momuhingo tjingewo ingwi ngu ma ri Ami ma kara nomuinyo mu Ami wina.” Joh. 6:56,57.

183. Otjikeŷa rukwao tji matji tu zikamisa moukriste wetu?

Moukriste wetu matu zikamisiwa atu kurisiwa na tu zeuparisiwa komambo waNdjambi nokongumbiro.

184. Omambo waNdjambi maye tu kurisa vi moukriste wetu?

Omambo waNdjambi maye tu kurisa moukriste wetu:

- 1) oku tu rakiza,
- 2) oku tu ronga,
- 3) oku tu honganga ozondunge,
- 4) oku tu tararisa,
- 5) noku tu vyura.

“Omambo aehe nga tjangwa mOmatjangwa ya tjangerwa okutuhonga, kokutja” tu kare nomaundjiro, nga zikama mouretima na momapandiparisiro ngu twa pewa i Omatjangwa.” Rom.15:4. “Omatjangwa aehe ya tjangwa nombatero yOmbepo yaNdjambi, nowo otji ye nondengu onene yokuhonga ouatjiri nokupirikira omahongero woposyo, nokuvyura ozondataiziro, nokukuna ongarero osemba, kokutja omundu ngu ri motjiungura tjaNdjambi a rire omupyuke tjinene nu e rirongerere okuungura otjiungura ngamwa atjihe otjiwa.” 2Tim.3:16,17.

185. Omambo waNdjambi ye nominda vingapi?

Omambo waNdjambi ye nominda vivari: Omambo womatwako nomambo wevangeli.

“Embo raNdjambi ri nomuinyo nu ri nomasa. Oro etwe okukapita engaruvyo ndi konda kuvari.” Heb. 4:12.

186. Omambo womatwako ye ungura tjike?

Omambo womatwako ye ungura:

- 1) maye tu raere tji nangara twa tataiza,
- 2) maye tu rongo tji twa nyono,
- 3) maye tu rakiza atuha tataiza rukwao,
- 4) maye tu renga naye tu hihamisa mominyo mena rozondataiziro zetu
- 5) maye tu urikire pona pu twa nyona
- 6) maye tu urikire kuJesus Kristus omuverure wetu.

“Omatwako ye honaparera omundu uriri eye ngunda e nomuinyo.” Rom.7:1 “Ami hitje tjiwa kutja ouvi otjikega andakuzu Omatwako kaye ndji tjiwisire. Ami hitje tjiwa kutja okunanukira otjina ondjo. Nungwari otja ketwako ndi ouvi wa muna oruveze okupendura ozonduma ngamwa azehe mu Ami.” Rom.7:7,8. “NOmatwako ye

tu tjevera tjinene nga Kristus tje ya, kokutja eṭe tu varwe otja ovasemba komurungu waNdjambi mena rongamburiro.” Gal.3:24.

187. Evangeli otjikeṇa?

Evangeli, omambo omatarazu omawa, inga nga pwa wodaya ombwa, ngu mae hongonona Jesus Kristus.

“Nembo ndi oro ouatjiri nu ra sokuyakurwa nokukamburwa i avehe, Kristus Jesus we ere mouye okuyekuyama ovanauvi.” 1Tim.1:15.

188. Omambo wevangeli maye tu hongo tjike?

Omambo wevangeli maye tu hongo Jesus Kristus kutja we tu kutura, we tu tatumisirwa na ṭire ozondjo zetu.

“Omambo ngu mba hungire ku eṅe ye eta Ombepo yaNdjambi ndji yandja omuinyo.” Joh. 6:63. “Orondu Ndjambi wa suverere ouye tjinene nai nga tja yandja Omuna we omukwatwaerike, kokutja auhe ngu ma kambura mu Ye a ha pandjara nungwari a kare nomuinyo waaruhe.” Joh.3:16. “Ami hi nokuṭohoni nOmbuze Ombwa, orondu oyo omasa waNdjambi kombwiro yaauhe ngu ma kambura.” Rom.1:16. “Nungwari ovihimise mbi vya tjangerwa kutja eṅe mu kambure kutja Jesus ongu ri Kristus, Omuna waNdjambi, nokutja mongamburiro yeṅu mu Ye a rire mu mwa kara nomuinyo.” Joh.20:31. “Ndjambi wa yandjere Omatwako mu Moses, nungwari otjari nouatjiri ovyo vya pitira mu Jesus Kristus.” Joh.1:17.

EKONDWA ORITJAHAMBONDATU ONGUMBIRO

189. Ngatu tjite vi, tu mune ozondunge nomasa okuzuva nokuṭakamisa omambo waNdjambi?

Tu mune ozondunge nomasa okuzuva nokuṭakamisa omambo waNdjambi, ngatu kumbe kuNdjambi.

“Nu mokati keṅu tji pe na ngu ma hepa ounongo, nga kumbe ku Ndjambi, nEye me mu pe, Ndjambi tjinga e yandja nouharupu notjari ku avehe.” Jak.1:5.

190. Ongumbiro otjikeṅa?

Ongumbiro oyo okukundasana komundu naNdjambi. Mongumbiro matu ryama kuNdjambi, nomambo we Ndjambi me tu zuvire.

191. Ongumbiro i na ominda vingapi?

Ongumbiro i na ominda vitatu: ongumbiro, ondjozikiro, ondangero.

192. Ndjambi ngatu kumbe kuye vi?

Ndjambi ngatu kumbe kuye mena raJesus nomombepo nomouatjiri.

“Tjiri, tjiri, me mu raere kutja Tate me mu pe ngamwa atjihe tji mamu Mu ningire mena randje.” Joh.16:23. “Ndjambi Eye Ombepo, nu imba mbu mave rikotamene ku Ye ve sokurikotamena ku Ye mOmbepo na mouatjiri.” Joh. 4:24.

193. Otjikeṅa tji matji tu ṅiṅikiza okukumba?

Ovina mbi mavi tu ṅiṅikiza okukumba ovyo mbi:

- 1) etwako raNdjambi, tji me tu raere tu kumbe,
- 2) orusuvero notjari nekwizikiro raNdjambi,
- 3) ouhepe wetu wokorutu nokomuinyo, nousyona wetu,
- 4) ouhepe nousyona wovakwetu.

“Ningireye nu mamu pewa, paheye nu mamu munu, kongoreye nu mamu patururirwa.” Mat.7:7. “Tji mu nongamburiro, ege mamu pewa ngamwa atjihe tji mamu ningire mongumbiro.” Mat.21:22. “Kwa ku Ami meyuva rombamisiro, Ami me ku yama, nove mo Ndji yozike.” Ps.50:15.

194. Ovina ovikeṅa imbi mbi tu sokuningira kuNdjambi?

KuNdjambi twa sere okuningira ovina avihe vyokorutu novyokomuinyo, imbi mbi mavi pwire Ndjambi nu mbi tu nohepero navyo nu mavi tu pwire wina.

195. Ndjambi u zuvira ozongumbiro zetu?

Ndjambi u zuvira ozongumbiro zetu, tji nangara oweṭe ovandu ovawa komurungu we, tji tu hina okupewa tjimanga, ihi tji twa ningira, okutja katjina okupwira Ndjambi. Ndjambi me tu pe ihi tji matji tu pwire, nu matji mu pwire wina.

196. Omongumbiro yiṅe matu hongwa okukumba ovina mbi mavi pwire Ndjambi?

Okukumba matu ku hongwa mongumbiro yaMuhona:
Tate yetu momayuru.

197. Ongumbiro ndji ongwaye tji mai isanewa kutja ongumbiro yaMuhona?

Mai isanewa kutja ongumbiro yaMuhona, orondu twa hongwa yo i Muhona wetu Jesus Kristus.

“Nopu mwa sokukumba nai: Tate yetu ngu u ri momayuru. Ena roye ngari yapurwe, ouhona woye ngau ye, ombango yoye ngai tjitwe na kombanda yehi otja meyuru. Omboroto yetu yeyuva arihe tu pao ndino. Nu tu isira ozondjo zetu, eṭe wina otja tji matu isire ovanandjo na eṭe. Nu o tu hitisa momarorero, nungwari kutura eṭe kouvi. Orondu ouhona owoye nomasa owoye nouyere owoye aruhe nga aruhe.” Mat.6:9-13.

198. Ongumbiro indji yaMuhona i na ominda vingapi? Ongumbiro indji i na ominda vitatu:

- 1) omambo wokomautiro
- 2) ongumbiro oini
- 3) nomambo wokomaandero

199. Omambo wokomautiro oyene?

Omambo wokomautiro owo inga: Tate yetu momayuru.

200. Ongwaye tji matu hongwa okwisana Ndjambi, Tate?

Matu hongwa okwisana Ndjambi, Tate, eṭe tu zemburuke

kutja Ndjambi Eye, Tate yetu tjiri, orondu Eye ingwi ngwe tu tjita ne tu kututra. Eye u tu parura ne tu yama omayuva aehe. Atu ha kara nomeripura woposyo, kako, nungwari tu kambure tjiri, kutja Eye ma vanga okuzuvira ongumbiro yetu.

“OOve ngu u ri Tate, Ove Muhona, oOve ngu u ri Tate. Ena roye ‘OOve Ndjambi wetu’ okuza korukuru.” Jes. 63:16.

201. Ongwaye tji matu tja: Tate yetu?

Matu tja Tate yetu, tu zemburukwe kutja ovandu avehe ovo ovazamumwe na eḗe tu na Tate iumwe, tu kare twa suverasana, nu tu kumbirasane.

“Ndjambi nu Hi yovandu avehe Eye iumwe uriri. Eye oMuhona waavehe, nu u unguha mu avehe nu u ri mu avehe.” Ef. 4:6.

202. Ongwaye tji matu tja: Tate yetu meyuru?

Matu tja Tate yetu meyuru, orondu eyuru oro otjihavero tjaNdjambi.

“Muhona ma tja nai: Eyuru oro otjihavero tjandje tjouhona, nehi oro okahavero kozombaze zandje.” Jes.66:1. “Muhona u ri mOndjuwo ye ondjapuke, otjihavero tje tjouhona tji ri meyuru.” Ps.11:4. “Omunauhona omuwa nerike porwe, Ombara yozombara noMuhona wovahona. Eye erike ngwi ngu ha koka, Eye wa tura mondjerera ku ku ha vazewa.” 1Tim. 6:15,16.

203. Mongumbiro indji yaMuhona mu na ozongumbiro ngapi?

Mongumbiro yaMuhona mu na ozongumbiro hambombari.

ONGUMBIRO ONDENGA ENA ROYE NGARI YAPURWE

204. Ena raNdjambi mari yapurwa vi?

Ena raNdjambi mari yapurwa tjinangara twa suvera Ndjambi matu mu tata, matu mu hivirike matu zuu kuye na tu takamisa omambo we na tu kara tjina Eye pu ma vanga.

“Kareye nondira ku Kristus momitima vyenu.” 1Pet.3:15. “Ondjerera yenu ngai yere komurungu wovandu, kokutja owo ve mune oviṅa oviwa mbi mamu tjiti, nu ve hivirike Iho ngu ri meyuru.” Mat.5:16.

ONGUMBIRO OITJAVARI OUHONA WOYE NGAU YE.

205. Otjirongo tjaNdjambi otjikeṅa?

Otjirongo tjaNdjambi otjo ouhona waNdjambi mbu pangerwa i Ombepo Ondjapuke.

“Orondu ouhona waNdjambi katjiṅa tjokurya nokunwa, nungwari owo otjiṅa tjousemba nohange nondjorokero, ndji za kOmbepo Ondjapuke.” Rom.14:17. “Ouhona waNdjambi mau ya nokuhinozonywaa. Nu kape na ngu ma tja, ‘Tara, owo mbwi’, poo ‘tara, owo mbwina’, orondu hapo mouatjiri ouhona waNdjambi u ri mokati keṅu.” Luk.17:20,21.

206. Ouhona waNdjambi mau ya vi kwete?

Mau ya, Tate womeyuru tji nangara me tu pe Ombepo Ondjapuke, kutja tu itavere omambo we omayapuke, kotjari tje matu kara otja kombango yaNdjambi mouye mwi nomouhona waruheruhe.

ONGUMBIRO OITJATATU OMBANGO YOYE NGAU TJITWE NA KOMBANDA YEHI OTJA MEYURU.

207. Ombango yaNdjambi oiṅe?

Ombango ondjapuki yaNdjambi oyo ndji:

- 1) Ndjambi ma vanga ovandu avehe ve hupisiwe, nu ve tjiwe ouatjiri;
- 2) mena ranao Eye ma vanga, ovandu avehe ve kambure muMuhona wetu Jesus Kristus,
- 3) ve rire ovasemba, tjina Eye mwini tje ri omusemba,
- 4) ma vanga ovandu va yenenise ombango ye nokuriṅiza momauzeu aehe wina.

“Eye u vanga kutja ovandu avehe ve ngingapare nu ve vase kondjiviro youatjiri.” 1Tim.2:4. “Nombango yaTate oyo ndji: Auhe ngwa munu Omuna nu a kambura mu Ye ma kara nomwinyo waaruhe; nAmi me mu pendura movakoke meyuva esenina.” Joh.6:40. “Ndjambi u vanga kutja mu rire ovayapuke, nokutja mu ritjaere oparukaze koruvakiro.” 1Tes.4:3. “Rireye ovayapuke, Ami tjinga ambi ri omuyapuke.” 1Pet.1:16. “Auhe ngu ma vanga okukongorera Ami, nga rinyequne omuini, a toore otjikoroise tje eyuva arihe, nu a kongorere Ami.” Luk.9:23.

208. Meyuru ombango yaNdjambi i yenenisiwa i uŋe?
Meyuru ombango yaNdjambi i yenenisiwa i ovaengeli novayapuke, imba mbe ungurira, nu ve tanga na ve hivirike Ndjambi nenyando.

“Tangeye Muhona, oweŋe vaengeli ovanamasa, mbu mu kara nonɖuviro komarakiza we, nu mbu mu puratena ku imbi Eye mbi ma hungire. Tangeye Muhona, oweŋe ovimbumba vyeyuru amuhe, mbu mu Mu karera nokuyenenisa ombango ye!” Ps.103:20,21. “Pa ri ovandu omayovi omengi mbuyave mu karere, novandu omangete mba kuramene komurungu we.” Dan.7:10.

209. Oouŋe imba mbu mave tu tjaere okuyenenisa ombango yaNdjambi kombanda yehi?
OSatan nouye nonyama yetu oiŋi oyo mai tu tjaere okuyenenisa ombango yaNdjambi kombanda yehi.

“Notjitjupamuro otjikuryoma hi tja imbirahiwa, indji onyoka onguru, ndji ku za Omudiaboli poo oSatan, nu ndji pukisa ouye auhe. Otjo tja nakaurirwa kombanda yehi puna ovaengeli vatjo.” Omav. 12:9. “Amu suvere ko ouye noviŋa avihe vyouye. Tji mwa suvere ouye, okutja kamuya suvera Tate.” 1 Joh. 2:15. “Ami me tjiwa nawa kutja ouwa mu ami kau tura, me hee kutja mongaro yandje otja ngu mbi ri omundu, orondu nandarire kutja indji ombango yokutjita ouwa mbi na yo, ami hi sora okuutjita!” Rom.7:18.

210. Ouye otjikeŋa?
Ouye owo: ovandu imba mbe hi na Ombepo Ondjapuke

yaNdjambi noviungura vyawo nongaro yawo kai na tja nomambo waNdjambi.

211. Onyama yetu otjikeṇa?

Onyama yetu oyo ozonḡuma zonyama, nouvi auhe mbu ri mu eṭe.

212. Ounḡe ngu me tu vatere okutaara ovanavita na eṭe imbo, kutja tu yenenise ombango yaNdjambi?

Ndjambi Eye erike ngu tu vatera okukondjisa nokutaara ovanavita na eṭe imbo, kutja tu sore okuyenenisa ombango ye.

“Simon, Simon, puratena! Satan ma pewa ousemba okumurora amuhe tjimuna omukune tje sisira ovikokotwa kotjisisiro. Nungwari Ami mba kumbira ove, Simon, kutja ongamburiro yoye ai ha yanda.” Luk.22:31,32. “Orondu nokuhinaami kamu na tji mamu sora okutjita.” Joh.15:5. “Nopu me zu okuwora ozongoro komurungu walhe. Ami me kumbu ku Ndjambi kutja mOmbepo ye e mu zeuparise okuza moutumbe wounene we, mu hare omasa moukoto weṅu oveni.” Ef.3:14,16.

ONGUMBIRO OITJAINÉ

OMBOROTO YETU YEYUVA ARIHE TU PAO NDINO.

213. Mongumbiro ndji ongwae tji matu tja: Tu pao?

Mongumbiro ndji matu tja tu pao, orondu eṭe katu ye ri ungurira otjina, nungwari avihe matu pewa otjari i Ndjambi.

“Otjiyandjewa atjihe otjiwa, notjipewa atjihe otjipwe, vi za keyuru. Ovyo vi za kombanda ku Ndjambi.” Jak.1:17. “Ami me sere Sion ondaya mokuipa oviparure ovingi, mbi mai hepa; me kutisa ovasyona vayo novikurya ovingi.” Ps.132:15.

214. Omboroto ndji matu ningire mongumbiro ndji otjikeṇa?

Omboroto, ndji matu ningire mongumbiro ndji, oyo ovina avihe vyokorutu vyokupwisa okukara kwetu kombanda yehi.

ONGUMBIRO OITJATANO

NU TU ISIRA OZONDJO ZETU, ETE WINA OTJA TJI MATU
ISIRE OVANANDJO NA ETE.

215. Mongumbiro ndji matu kumbu tu pewe tjike?

Mongumbiro ndji matu kumbu mena rotjari tje nomena rOmukutire wetu Jesus Kristus, Ndjambi e tu isire ozondjo zetu azehe nozongatukiro zetu azehe, ehe zi zemburuke rukwao.

216. Ongwae tji maku wezwa omambo ngu mae tja: otja tji matu isire ovanandjo na ete?

Maye weziwa ko, orondu momambo nga Jesus ma vanga okutuhonga, tu isire ovanandjo na ete ozondjo inda ozonditi, orondu Ndjambi u tu isira ozondjo inda ozengi omayuva aehe.

“Tji we yokupunguhira Ndjambi otjiyandjewa tjoye kotjipunguhiro no zemburuka kutja omukweŋu u nombiri na ove, indino tji esa otjiyandjewa tjoye mbo komurungu wotjipunguhiro, nu u hakahane okukahangana nomukweŋu, tjazumba u kotoke u yekupunguhira Ndjambi otjiyandjewa tjoye.” Mat.5:23,24. “Tji mwa kurama okukumba, nu tji mu notjiŋa nomundu, indino mu isireye kokutja lho ngu ri meyuru wina e mu isire ozongatukiro zeŋu.” Mark.11:25.

217. Ovanandjo na ete ngatu ve isire vi ozondjo zao?

Ovanandjo na ete ngatu ve isire ozondjo zao, ka nomambo womotjinyo uriri, nungwari onomuinyo auhe, tu zembe imba pu va nyona kweŋe, tu ve hongere, nu tu ve vangere ouwa.

“Ami me mu raere kutja suvereye ovanavita na epe nu mu kumbire imba mbe mu tatumisa.” Mat.5:44.

**ONGUMBIRO OITJAHAMBOUMWE
NU O TU HITISA MOMARORERO, KAKO.**

218. Nungwari Ndjambi u rora ovandu?

Ndjambi ka roro nandarire omundu umwe, kako. Nungwari eyuva rimwe metu roro, na yesa ovanavita na eṭe ve rore, ongamburiro, eriyameko nomutimaomure wetu tu rorwe, tu munike kutja tu nongamburiro, ndji ta pi, tjina Ndjambi tja rora Abraham naJob.

“Orondu Ndjambi ka rorerwa kouvi, nEye omuini ka roro omundu.” Jak.1:13. “Ndjambi arire tja tja: Toora Isak, omuzandu woye omukwatwaerike, ngu wa suvera, nu twende kehi raMorija u kemupunguhire ngo otja ombunguhiro oningirisiwa kondundu, ndji me ku urikire.” Gen.22:2. “Muhona arire tja tja nai ku Satan: Osemba, eye ngo u ri mouvara woye, nungwari o mu zepa.” Job.2:6.

219. Omarorero inga omavi mae zu kuṅe?

Omarorero omavi mae zu kuSatan.

“Kareye nomuungutima nu mu kare katumba! Omunavita na eṅe, ingwi Satan, u ryanga otja ongeyama, ndji mai tye ovimbororo amai paha ingwi ngu mai vanga okuteta.” 1Pet.5:8. “Nami tjinga ambi ha sorere okuundja orure, opu mba hindira Timoteus okuyekutjiwa ongamburiro yeṅu kutja ngahino omurore we mu rora, nokutja oviungura vyetu avihe ngahino vya rira omungandjo.” 1Tes.3:5.

220. Ovavatare vaSatan mukurora ovandu oowani?

Ovavatare vaSatan mukurora ovandu owo ouye nonyama yetu oveni.

221. Ouye mau to roro vi?

Ouye mau tu roro: Imba ovandu mbe hi nakonatja naNdjambi tji mave tu tatumisire ongamburiro yetu, poo tji mave vanga okutuyeka ondengero yetu, nokutunda ena retu ewa, poo ovina vyetu, poo mave tu roro tu tjite ozondataiziro, nu mave vanga okutupandjarisa, porumwe

nomambo woharive, poo noviungura vyao, poo novikaro vyao ovivi.

“Ouye tji we mu tondo, tjiweye kutja owo rutenga wa tonda Ami.” Joh.15:18. “Owee kouye mu mu noviḡa mbi putarisa omundu. Oviḡa otja imbi vari aruhe vi ya.” Mat.18:7. “Ovanauvi tji mave ku roro, muatje wandje, o zuu ku wo.” Omia.1:10.

222. Onyama yetu oveni mai tu roro vi?

Ozonḡuma zonyama nomeripuriro wourunde ya yandjwa i Satan, omeripuriro inga mae tu roro tu nyone komurungu waNdjambi.

“Orondu imbi ongaro youndu mbi i nanukira, vi pirukira imbi Ombepo mbi i vanga; nu imbi Ombepo mbi i nanukira, vi pirukira imbi ongaro youndu mbi i vanga. Oviḡa vivari mbi ovinavita kumwe, notji mu hi nakusora okutjita imbi mbi mu vanga.” Gal.5:17. “Vakwetu ritjaereye kozonḡuma zonyama aruhe nḡe novita nomuinyo.” 1 Pet.2:11.

223. Omarorero inga omavi matu ye taara natjike?

Omarorero inga omavi ngatu ye rwise nongamburiro, okukambura muNdjambi, tu kare katumba, tu kumbe, atuha urwa, tu na Jesus Kristus, indino matu taara.

“Avihe mbi tjiteye amamu kumbu nu mu ningire ku Ndjambi aruhe mOmbepo. Kareye katumba nu aruhe mu kumbire ovakwetu ovakambure avehe.” Ef.6:18. “Omuatje auhe waNdjambi tjinga ama yenene okutoḡa ouye. Noutḡi mbu·twa toḡa na wo ouye wa za mongamburiro yetu.” 1Joh.5:4.

224. Omarorero inga matu rorwa nao vi?

Omarorero matu rorwa nao owo inga: motjari nomorusuvero rwaNdjambi tje tu yesa tu rorwe, kutja ongamburiro nouḡakame vi kurisiwe, nu vi zeuparisiwe, vi munike vya zikama tjiri.

“Yorokereye otjḡa hi, nandarire kutja ma rire ohepero eḡe okuḡoruhoze oruveze oruḡiti momarorero ngamwa aehe mu mu ri.

Nomarorero nga maye raisa kutja ongamburiro yeŋu oyatjiri. Nangarire ongoldo ndji yanda i rorwa momuriro, komuhingo mbwi ongamburiro yeŋu ndji ri onandengu tjinene pongoldo wina otji mai sokurorwa kutja ondji ri yo, tjiri. Indino otji mamu pewa ondangero nondjingonekero nondjozikiro mEyuva Jesus Kristus ndi me ya rukwao.” 1Pet.1:6,7.

ONGUMBIRO OITJAHAMBOMBARI NUNGWARI KUTURA ETE KOUVI

225. Ouvi mbu matu kumbu kuNdjambi e wise mo, ouvi waye?

Ouvi auhe imbwi mbu tu na mouye mwi, imbwi mbu mau tu tatumisa korutu nokomuinyo, matu kumbu Ndjambi e tu ise mouvi waaruhe mena rotjari tje nomena rOmukuture wetu Jesus Kristus.

“Tjiri, owami omundu ngu mba ningisa ondjenda! Owani ngu me ndji kutura korutu ndwi ndu maru ndji twara konđiro?” Rom.7:24.

226. Matu kumbu Ndjambi kutja e tu ise mo vi mouvi? Matu kumbu Ndjambi e tu yame atuha vazewa kovipo, kousyona, nokozondatumisire ozonene nozonđeu zokorutu nozokomuinyo, nu tjinangara twa vazewa, ndino Ndjambi nge tu pe omasa, tu riŋize ngandu tje tu isa mozondatumisire inđo, nomayuva wetu tji yaanda, Eye e tu ise mouvi auhe, Eye e tu tware kouningandu waaruhe.

“Eye ongwe tu yama koumba ounene nai wonđiro, nu wina Eye mee tu yama. Ku Ye oku matu undju kutja Eye mee tu yama rukwao.” 2Kor.1:10. “Muhona me ndji yama kourunde auhe, nu me ndji hitisa nokuhinatjipo mOuhona we womayuru.” 2Tim.4:18.

227. Ongumbiro yaMuhona mai yandisiwa nomambo yeŋe?

Mai yandisiwa nai: Orondu ouhona owoye nomasa owoye nouyere owoye aruhe nga aruhe. Amen.

228. Momambo nga matu hongonona vi?

Ndjambi Eye ombara yeyuru nehi, ngu nomasa okutupa, ihi tji twa ningira, na eṭe ovanu vomotjirongo tje twa sere okuyandja ondangi kuye noku mu yozika noku mu hivirika.

EKONDWA ORITJAMUVYU**EYANḐIMUKO NONDANAUKIRO NONGAMBURIRO****229. Eyanḏimuko oro otjikeṇa?**

Eyanḏimuko oro otjiungura tjtjari tjaNdjambi, tji tji ungurwa i Ombepo Ondjapuke mominyo vyovandu. Eyanḏimuko oro erikonḏononc, Ombepo Ondjapuke tji mai kahururire omundu omwano mbwe ri nomundu meri munu kutja eye omunauvi omuverwa komurungu waNdjambi. Omukriste ma hepa arire omuyanḏimuke eyuva arihe.

“Orondu ozongatukiro zandje mbi ze i, nomaui wandje aruhe ye ri komurungu wandje. KOve, nu kOve erike ami oku mba tura ondjo, ne tjiti ouvi momeho woye. Okutja otji u nousemba okundjipangura nokundjipa ondjo. Ami owami omunauvi okuza kongwaterno yandje, nu mama we ndji yakana mouvi.” Ps.51:3-5. “Ami me tjiwa nawa kutja ouwa mu ami kau tura, me hee kutja mongaro yandje otja ngu mbi ri omundu, orondu nandarire kutja indji ombango yokutjita ouwa mbi na yo, ami hi sora okuutjita! Imbwi ouwa mbu mbi vanga okutjita, hi u tjiti, nungwari imbwi ouvi mbu mbi ha vanga okutjita ombu mbi tjita.” Rom.7:18-19. “Kristus Jesus we ere mouye okuyekuyama ovanauvi. Ami owami ngu mbi ri omunauvi tjinene pu avehe.” 1Tim.1:15.

230. Ondanaukiro oyo otjikeṇa?

Ondanaukiro oyo okukawondja kuNdjambi. Omundu tje ri munu kutja eye omunauvi nomupindikirwa, nouvi we mau mu ririsa, eye ma sekama na i komurungu waNdjambi tjina tje ri, ke na tji ma undike, ma pura Ndjambi e mu tjite pu ma vanga.

Ondanaukiro oyo wina otjiungura tjtjari tjaNdjambi, tji tji

za mokuzuva omambo waNdjambi, nungwari rutenga okuza mevangeli mari hongonona Jesus Kristus Omukutire wovanauvi.

Omukriste ma hepa ondanaukiro eyuva arihe.

“Korusenina eye we rizemburuka na tja: ‘Tate u novemuungurire ovengi, nowo avehe ve novikurya mbya takavara, nu owami ngwi me tondjara muno mwi. Me sekama, e yaruka ku tate ne katja nai kuye: ‘Tate, ami mba tura ondjo komurungu waNdjambi nakomurungu woye. Opu mbi ha pwire okuisanewa omuatje woye rukwao, ndji vara otja umwe wovakarere voye.’ Neye otja sekama na yaruka ku ihe.” Luk.15:17-20. “Ngamu tji ritanaura omitima, nu mu vingurukire ku Ndjambi, kokutja Eye e mu isire omauvi wegu.” Oviu.3:19. “Nungwari nambano moruwano naKristus Jesus ene mbu mwa ri kokure mwa tumbuzirwa popezu i ombindu yaKristus.” Ef.2:13.

231. Ongamburiro oyo otjikeŋa?

Ongamburiro i na ominda vivari, imwe oyo okukambura nohange ihi Ndjambi tja kwizika momambo we, ongamburiro yarwo oyo okuriyandja kuNdjambi nouṭakame watjiri.

Ongamburiro otjo otjiungura tjOmbepo Ondjapuke tji tji za mokuzuva omambo waNdjambi.

“Ongamburiro otji i za momazuvarisiro omundu ngu ma zuu nomazuvarisiro ngu tu zuva owo omazuvarisiro waKristus.” Rom.10:17. “Indji ongamburiro oyo okuriyameka koviŋa, mbi tu undja, nokutjiwa, tjiri, imbi mbi ha munika.” Heb.11:1. “Ngatu siririke omeho wetu muJesus, omuute nomuyenenise wongamburiro. Mena renyando nda ri momurungu we, Eye wa zara otjikoroise nokuhinokuṭohogɔ, nu nambano Eye wa kakara pehi kokunene kwotjihavero tjouhona tjaNdjambi.” Heb.12:2. “Me tjiwa ingwi ami ku mbe riyameka. Nu me tjiwa, tjiri, kutya Eye u nomasa okuṭakamisa nawa mbya yandja ku ami nga kEyuva ndi Eye ndi me ya rukwao.” 2Tim.1:12. “Jesus a tja ku ye: Ove wa kambura motjimbe tjokutja we Ndji munu are? Ovaŋingandu imba mba kambura ave hiye Ndji muna!” Joh.20:29.

232. Ngatu tjite vi, atu ha pandjarisa outumbe wetu womuKristus?

Atu ha pandjarisa outumbe wetu womuKristus ngatu kare katumba.

“Kareye nomuungutima nu mu kare katumba! Omunavita na ege, ingwi Satan, u ryanga otja ongeyama, ndji mai tye ovimboru amai paha ingwi ngu mai vanga okuteta.” 1Pet.5:8. “Kareya nomuungutima nu mu kare katumba kutya mu sore okukumba.” 1Pet.4:7. “Kareye katumba nu mu zeuparise ihi tji tji nomuinyo mokati kepu ngunda atji hiya ta.” Omav.3:2.

233. Okukara katumba okutja vi?

Okukara katumba: Omukriste tje takamisa oukriste we na takamisa ongumbiro nokulesa nokupuratena omambo waNdjambi. U yenda komariro omayapuke waJesus, nu u yepa na tondo ouvi. Ma rwise Satan nouvi nonyama ye na takamisa okukara omundu waNdjambi.

234. Omukriste u sokukara katumba rune?

Omukriste u sokukara katumba omayuva ayehe nga kondiro ye.

“Kareye noukakame nga kondiro, nAmi me mu pe omuinyo otja ondjambi youtoni wepu.” Omav.2:10. “Ami mba rwa otjirwa otjiwa okumana, mba topa motjikara tjetjirakaneno, nu mba pandera pongamburiro. Nambano pa sewa oruzenga rwondogeno ku ami, Muhona, omupangure omusemba, ndu me ndji pe meyuva ndi me ya, - nu kakutja oku ami porwandje, nungwari wina oku imba avehe mbe undja nondero inga omeero we.” 2Tim.4:7,8.

EKONDWA ORITJAMURONGO OVIŃA VYEUVA ESENINA

235. Eyuva esenina mari ya rune?

Eyuva esenina mari ya, nungwari kape na omundu ngu ma tjiwa kutja orune.

“Nungwari kape nomundu ngu ma tjiwa eyuva ndo na indji oiri, nangarire ovaengeli meyuru, nangarire ingwi Omuna posi yaTate omuini porwe.” Mat.24:36. “Kapeṅu okutjiwa otuveze nomayuva Tate nga zikamisa mouvara we omuini.” Oviu.1:7.

236. Oviṅa mbi mavi ka tjitwa eyuva esenina ovine?
Oviṅa mbi mavi ka tjitwa eyuva esenina ovyo mbi:

- 1) Omeero waMuhona Jesus Kristus oyetjavari;
- 2) Ombendukiro yovakoke;
- 3) Ombanguriro osenina;
- 4) Okuyandeka ehi ndi;
- 5) Ombutiro yehi epe.

237. Omeero waMuhona wetu Jesus Kristus inga oyetjavari mae kara ya sana pi?

Jesus me ya mouhenḅendu nomundu auhe memu munu nouyere we pu novaengeli ve avehe. Eye a wongo ovandu avehe, ovanamuinyo novakoke komurungu we.

“Omuna wOmundu tji me ya otja ombara puna ovaengeli ve avehe, indino Eye ma kara pehi kotjihavero tje tjouhona. Noviwaga avihe mavi woronganene pu Ye. Tjazumba Eye e vi haḅa movimbumba vivari tjimuna omurise tje haḅa ozonḅu kozongombo.” Mat. 25:31,32.

238. Jesus Kristus tji me ya otjikando otjityavari, ovandu mbu mave vazewa ve na opuinyo maave ka tjitwa vi?

Momeero waJesus omaetjavari ovanamuinyo mave tjitukisiwa mombapaiziro yeho, narire tji va twarwa kuJesus.

“Tareye, Ami me mu tjivisa omaundikiro nga: Eḅe atuhe katu, nakuḅa, nungwari atuhe matu tjitukisiwa. Orondu orutu ndwi oruḅe maru tjitukisiwa okurira indwi oruhaḅa, nu indwi ndu koka maru tjitukisiwa okurira indwi ndu ha koka.” 1Kor.15:51,53.

239. Imba mba ɔa mave ka tɔitwa vi?

Imba mba ɔa mave ka pendurwa, imba ovasemba mave pendukire omuinyo na imba ovanamanyengu mave pendukire ombanguriro.

“Oruveze maru ya ovaɔi avehe mu mave zuu eraka re nave piti momayendo wawo. Imba mba tɔita ouwa mave penduka nave kara nomuinyo, nu imba mba tɔita ouvi mave penduka nave pangurwa.” Joh.5:28,29.

240. Ovasemba mokupenduka mave penduka notutu, tu tu ri vi?

Mombendukiro yawo ovasemba mave penduka notutu otuyere, twa sana korutu roMuhona wetu Jesus Kristus rouyere.

“Nungwari eha retu ri ri meyuru, nu matu undju omukufure wetu Jesus Kristus oMuhona, a rauke keyuru. Eye ma tɔitukisa otutu twetu otungundi notukoke kutja tu sane nomuhapo worutu rwe orunandjozikiro, tɔinga e nomasa okuwisa oviɔa avihe kehi youhonapare we.” Fil.3:20,21. “Otɔinga ape ri nao nombendukiro yovaɔi. Orutu tɔi rwa pakwa, okutja rwa ɔu, nu tɔi rwa pendurwa karu uhara amaru ɔu. Norutu tɔi maru pakwa orwo orutu rwoundu nu tɔi rwa pendurwa orwo orutu rwombepo.” 1Kor.15:42,44. “Nungwari matu tɔiwa kutja Eye tɔa munika eɔe matu sana ku Ye, orundu matu Mu munu otja tɔinga e ri.” 1Joh.3:2.

241. Ombanguriro osenina mai ka tɔitwa vi?

Ombanguriro osenina mai ka tɔitwa: Ovandu avehe tɔi va woronganiswa komurungu wotjihavero tɔjombanguriro, mave pangurwa otja koviungura ovandu imbi mbi va tɔitire tɔi va ri nomuinyo.

“Orundu eɔe atuhe tu sokumunika komurungu waKristus okupangurwa i Ye. Nu auhe ma pewa imbi mbye sokupewa otja ku imbi avihe mbya tɔitire ngunda e nomuinyo kombanda yehi, kutja vya ri oviwa poo vya ri ovivi.” 2 Kor.5:10.

**242. Ombanguriro mai ka zuvarisiwa nomambo yene?
Ombanguriro mai ka zuvarisiwa nomambo nga:**

“Okuzambo indji Ombara mai tja ku imba mbe ri kokunene kwayo: Indjeye, vanandaya vaTate! Indjeye mu rumate ouhona mbwa tuninwa ege okuza kombutiro youye. Okuzambo otji mai tja ku imba mbe ri kokumoho kwayo: Zepoeye pu Ami, ege mbu mwa sengwa i Ndjambi! Twendeye komuriro mbu ha zemi, nu mbwa tuninwa Satan novaengeli ve! Nowo mave hindwa komberero yaaruhe, nungwari imba ovasemba mave i komuinyo waaruhe.” Mat. 25:34,41,46.

243. Omuriro waaruhe otjikeṅa?

Omuriro waaruhe owo okuhamisiwa kwaaruhe moheli, ovehenakonatja naNdjambi imba mave ka imbirahiwa mave ka tatumisiwa nga aruhe.

“Neye ngunda e ri motjovakoke momihiamo ominene, otja tumununa omeho we na mwine Abraham kokure e na Lasarus megoro, narire tja ravaere a tja: Tate Abraham, ndji tjariparera, nu u hinde Lasarus a katjaveke ohonga yomunwe we momeva nu e ye okutarareka eraka randje, orondu mbi hihamwa tjinene morururumo ndwi.” Luk.16:23,24. “Omativa mu ye ha koka, nomuriro mu u ha zemisiwa.” Mark. 9:44.

244. Omuinyo waaruhe otjikeṅa?

Omuinyo waaruhe owo enyando enene ndi u hina okusasaneka notjina, owo ouningandu waaruhe meyuru, imo ovasemba mave tara aruhe omurungu waNdjambi a ve mu tanga nave mu yozike nave muungurire nga aruhe.

“Ihi omundu tje ha munine nu tje ha zuvire nu tje ha ripurire momutima we, otjo Ndjambi otja tunina imba mbe Mu suvera.” 1Kor.2:9. “Ihi eṅe tji matu munu nambano, tji ri otja otjisanekero motjitarero otjijumbe, nungwari eyuva rimwe me kevitjiwa okuura otja Ndjambi tjinga e ndji tjiwa nai.” 1Kor.13:12. “Matu Mu munu otja tjinga e ri.” 1Joh.3:2.

245. Ehi ndi ranambano noviṅa avihe vi ri mo mavi ka tjitwa vi?

Ehi ndi ranambano noviṅa avihe mbi ri mo mavi yandekwa, nu mavi nyosiwa navi nyonwa komuriro eyuva esenina.

“Nungwari Eyuva raMuhona mari ya mongumumu otja erunga. MEyuva ndo eyuru mari zengi nomungunda omunene, noviutwa vyeyuru mavi nyosiwa navi nyonwa, nehi na avihe mbi ri mu ro mavi ningirire.” 2Pet.3:10.

246. Ehi ndi tji mari nyonwa po otjikeṅa tji matji tjitwa poruveze rwaro?

Ehi ndi tji mari nyonwa po, poruveze rwaro mape tjitwa ehi rarwe epe, imo ovasemba mave ka kara mo.

“Tara, Ami me yarura avihe koupe!” Omav.21:5. “Nungwari eṅe matu undju imbi Ndjambi mbya kwizika. Eyuru epe nehi epe mu mamu tura ousemba.” 2 Pet.3:13.